

萬 有 文 庫

第 二 集 七 百 種

王 雲 五 主 編

樊 榭 山 房 集

(六)

厲 鶚 撰

商 務 印 書 館 發 行

樊榭山房集
(六)

厲鶚撰

國學基本叢書

編主五雲王
庫文有萬
種百七集二第

集房山榭樊
册六

中華民國二十五年三月初版

撰者 厲鶚

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

詳

樊榭山房集外詩序

蓋聞皇娥既逸。韻不唱夫璇宮。穆滿云遙。歌未傳于瑤島。月中桂樹。羽士難逢。源裏桃花。漁郎安在。天上乏騶鸞之客。人間無吐鳳之儔。迨至庾開府仗清新之氣。郭景純用雋上之才。開生面于青宮。奪夜光于元圃。然而辭多感慨。同坎壈之詠懷。調本輕滌。非列仙之本趣。難匹休乎子建。終見笑于鍾嶸。仙詠難工。由來久已。厲先生太鴻者。玉皇香吏。暫謫塵寰。碧落侍郎。僑居瀛海。朱异賦弓之歲。便解操觚。蘭成射策之年。卽聞染翰。琅玕披腹。門無題鳳之賓。珠玉爲心。座有解龜之賞。一丸飛藥。逢璋瑞于西山。九節菖蒲。遶商邱于北海。東華公子。舊是相知。南嶽夫人。新爲結客。凝神濯魄。原無俟于冰壺。洗髓伐毛。亦何須于紫水。乃瓊霄有路。闔苑多歧。旣非感遇之劉楨。詎作嫉邪之趙壹。聊寄懷于元遠。遂託詠于遊仙。數凡三百。謝家胡蝶之篇。字過八千。倪氏梅花之製。洞中蕊簡。始足揮毫。海上珊瑚。差堪架筆。月穿高樹。依蘿戶以敲金。風度碧天。傍雲窗而戛玉。江花滿篋。種由瓊草之田。潘錦連箱。裁作流霞之帔。行間冰雪。噴來卽是元霜。腕底蛟螭。瀉出何殊碧海。笑驅素豹。盤桓墨椀之中。怒逐朱龍。遊戲硯池之側。崑崙島嶼。不用支筇。煙渚茫茫。何須買舶。苔牋十幅。俄成王屋之峯。湘帙一函。都是蓬萊之島。以神仙爲輸寫。借文翰爲遨遊。可謂盡名士之才情。極仙人之本色者矣。僕與先生。雲霞意氣。泉石投交。架上琅函。共讀通明之卷。籀

邊黃菊。曾傾陶令之杯。風義平生。兼之師友。相逢今日。示以瓊瑤。擊節三終。何惜玉壺之缺。披吟數過。恍登銀闕之遙。攜來市上。誰不購以千金。若在牀頭。人自函其一部。斥曹唐於下座。誰曰不宜。坐何劭于廡閒。僉云允稱。引尊相對。聊當醴醕之漿。浣手高吟。除是薔薇之露。書藏二酉。何用秣糠。紙貴三都。甯關元宴。爰等茲于弁髦。敢用是爲前驅。謹序。弟杭世駿拜撰。

樊榭山房集外詩序

柏梁臺上。曾傳五岳之圖。金馬署中。亦著十洲之記。龍師與魚吏俱升。桂父偕茅君共舉。游戲紫清之上。翱翔碧落之中。桐峯梓瑟。倚歌而和。皇娥湘水。瑤琴彈曲而迎。帝子玄雲新韻。久唱璇宮。黃竹舊詞。猶留瀛島。樂哉仙乎。斯其至矣。然而東海棗花。空憶齊侯之語。西池桃核。莫延漢帝之年。是則塵緣未斷。人間烟路。遂遙天上。乃有抽思幽祕。發藻鮮妍。翦月爲心。鏤霞作想。雲君太乙。體雖誕而不刪。佚女羽人。意似夸而有取。參軍調逸。爰咏升天之篇。子建才高。遂有步虛之作。至於宏農之始倡。實爲屈子之餘波。事雖寄于遊仙。情則等於感遇。後有作者。咸步趨焉。此皆天情騰踔。清思雕華。淹躓窮途。漂搖愁境。排雲闔闔。思翻玉女之壺。追日虞淵。欲紮羲和之轡。塵迷赤縣。將晞髮于滄溟。唾棄齊州。擬伐毛于紫水。句飛蘭露。滴盡金壺。紙疊桃花。噴成繡字。洞天福地之勝。常以神遊。銀臺瓊闕之間。奚勞氣馭。誠可謂揮斥八極。逍遙九垓者矣。僕無凌雲之才。有餐霞之癖。懶如中散。論或託于養生。貧似稚川。書未傳夫抱朴。山居長嘯。偶有遐心。蘿戶高吟。遂多逸興。身非脈望。何曾三食琅函。腹愧鞠通。安得一滄墨海。譬彼學仙。項曼詭言。渴飲流霞。好道長源。詐說餽來玉液。但以俗緣羈絀。塵網櫻纏。與其作白眼以看人。何如問青天而搔首。於是效嘯郭璞。學步曹唐。前後所爲。數凡三百。瑤臺夢破。喚起飛瓊。洛浦舟迴。拾殘翠羽。曾無當于風雅。

亦見擗于莊騷。持贈何堪。自娛而已。時當朱明屆節。白日舒長。何方避暑。玄冰飛雪之丸。無計迎涼。鵝羽龍皮之扇。襞牋雪案。豈窺大酉之書。滌筆冰甌。聊當龜茲之枕。康熙癸巳季夏八日。錢塘厲鶚。題于寄圃之半舫齋。

樊榭山房集外詩引

詩家游仙一體。自唐人以來。多爲絕句。或別有寄託。或近香簌豔情之作。而出以迷離愴悅之辭。要無無謂而作者。此集爲游仙詩三百首。其託意不可知。而語帶煙霞。有雲愁海思之遺。所謂詩雜仙心者也。先生編樊榭山房前後二集。皆不登載。聞舊有堇浦先生一序。亦未之見。此本乃郡人所傳鈔者。亟爲梓而傳之。零珠碎璧。猶可寶貴。況三百首之多耶。同里後學陳鴻壽引。

樊榭山房集外詩卷上

游仙百詠有序

游仙詩自晉郭景純倡之。逮唐曹堯賓。明馬鶴松。連篇累牘。奇豔可誦。予閒居寡歡。偶爾綴韻。輒成百章。大要游思嚙語。雜以感慨。玉茗先生所謂事之所無。安知非情之所有者也。且靈均作騷。尙託于雲中君湘夫人。其亦庶幾不悖作者之意乎。有好事者。出而讀之。詞雖不工。聊當龜茲一覺云爾。康熙庚寅六月。樊榭山人自題。

旭影瞳瞳若木枝。與君雲路遠相思。寄將一幅琅玕紙。要寫三山星子詞。
東華南嶽笑相邀。笙鶴時聞下沈寥。月裏忽驚青鳳舞。坐中誰弄九靈簫。
入水閒乘赤鯉魚。具區秋淨接空虛。橫吹煙竹包山裂。待與龍威索素書。
鶴背霞光縹渺生。乘風御氣滿天行。丈人笑指前頭去。不到青城到赤城。
小童汲水煮金芽。藥徑松蹊仙子家。只恐無端賺劉阮。洞門不許種桃花。
石橋跨澗水鄰鄰。白草青芝遠世塵。林屋洞中無甲子。一朝天后不知春。
瑤池仙史許飛瓊。阿母傳呼到玉京。龍月城中親采進。黃中朱李字分明。

散仙自有玉樓才。點石爲金數未該。欲買鏡湖山一半。黃妃許借聘錢來。
元圃年年發異葩。折來笑向媚蘭誇。金莖琪樹同千歲。不是人間短命花。
雲霞空裏擁旌旄。多謝金妃賜絳桃。歸到洞天纔日午。青童閒曬赤霜袍。
絕澗高峯斷白雲。清風爲佩織煙裙。玉笙吹落桃花月。萬壑千崖人不聞。
綸巾羽扇綠蕉衫。懶把高風混俗凡。雲笈錦函都讀遍。幾時同到積書巖。
碧谿半繞玉莎斜。處處春雲處處花。笑問羅天香發未。侍兒齊候白鸞車。
紅雲樓閣迴崔嵬。虎豹天關晝洞開。昨進下方求雨疏。紫清敕遣鐵車雷。
靈藥葫蘆慣繫腰。醉歸時有鶴相招。罡風亦識飛仙過。扶住空中五色橋。
絳節朝回下玉階。紫雲盡繞素綾鞵。洞天月暗歸何處。十六華陽金字牌。
清虛標格自高寒。弄罷瑤琴倚石闌。螭髓麟指都俗膩。胡麻爲飯菊爲餐。
溟渤茫茫入望無。半瓢身共水雲孤。月明飛過驚龍睡。爲有瓶中煮海珠。
霓佩霞衣拉伴遊。玉真亦自愛風流。金雞洞口何年遇。笑把桃花當蹇修。
琪花翻落紫瓊杯。邀得羣真踏月來。元碧酒醒天未曉。不知身臥醉仙臺。
懼仙貌古似長松。蒼鹿銜花兩兩從。攜得一枝猿臂笛。隨風吹上幔亭峯。

天風瀕洞玉虛寒。一朵香雲舞彩鸞。光碧堂中金母坐。峩峩不動九星冠。
人間睡境總濛濛。誰聽天雞叫碧空。試向金臺山頂望。海波初湧日輪紅。
九室雲開香篆飛。珠簾朝卷雨霏微。琉璃窗外低花影。知是煙霄降紫妃。
芙蓉冠子紫煙衣。一笑相逢跨鶴飛。贈我鳳冠仙栗美。海山遊徧不知饑。
翠河迴繞玉清鄉。兩兩仙姬象鳳皇。無底筠籃何所有。琅玕花滿露華香。
月映冰肌冷紫羅。下觀五嶽翠嵯峩。挹將斗柄歸瑤島。夜半清寒沆瀣多。
笑看海水浴金鴉。穩駕文虬禮玉華。八素元經親捧讀。碧琳字映曉天霞。
長綿樓上冠朝霞。靜倚雲窗萼綠華。爲憶雙雙玉條脫。一時留贈在羊家。
河源天半盡雲濤。同御長風興頗豪。八鳳珠旂駐瑤圃。開尊不惜酌龍膏。
玲瓏珠樹曉來青。調笑梁清隔錦屏。祇爲醉中疎禮數。天教罰作酒旗星。
下界求仙不可憑。豈知仙在最高層。冥冥風雨颺輪過。遙指靈壇芳苒燈。
月華碧藕浸冰壺。玉戶瑤階赤日無。自是蕉源清冷甚。何須更寫六壬符。
霞綃雲帔是新裁。曲曲仙源不易來。昨向扶桑今日返。滿身青雪下瑤臺。
清思逸藻入元虛。半畝煙霞手自鋤。何事玉皇猶未見。不收香案校文書。

龍睛仙稻滿天倉。粒粒珠璣夜有光。不比水仙居澤國。秋來只采芡爲糧。
翩翩白帝駕雲輶。不見皇娥十萬年。聞道別來滄海淺。雙眉依舊翦秋煙。
紫琅殿裏讀黃庭。不覺壺天夜色冥。素紙拈來輕似雪。翦爲明月照雲屏。
萬尺藤蘿蔽月明。玉京洞口溼雲生。山深并絕青猿叫。但聽波濤石裏鳴。
司中上將守天關。玉珮霓衣押兩班。素女傳宣呼上殿。自稱臣住小蓬山。
松濤灑灑響方壇。桐柏山中六月寒。巖下一泓清澈骨。夜深來浴碧霞丹。
穿雲忽見聳嵒峩。同駕青蜺看沃焦。滄海桑田非妄語。波濤萬古此中消。
崑崙瑤圃樂婆娑。悔返驂騑事若何。我欲閒乘希有鳥。來聽黃竹白雲歌。
碧空千里映瑤林。夜靜秋高爽籟深。天柱峯頭好明月。不知人世雨涔涔。
蜿蜒神物抱珠游。欲摘明珠綴玉旒。不用相求燒燕炙。五雷頃刻卷靈湫。
銀漢迢迢望轉賒。當年空說客乘槎。天孫夜靜調機杼。織出蓬萊五色霞。
驅光逐景白霓衣。遊戲三山弱水飛。蓮葉舟輕波渺渺。月中載得露華歸。
仙府層城隔彩霞。璇宮銀榜右英家。麻姑昨遣青衣至。邀看唐昌玉蕊花。
黃籀爲冠白葛衫。雲臺峯下石巉巖。道人不惜還丹訣。示我囊中紫玉函。

奇松危石轉山坳。洞府何人踏月敲。怪底夜深龍劍嘯。昨從鐵柱斬青蛟。
廣寒清冷桂花香。搗藥丁東怨夜長。一曲霓裳原絕調。人閒傳下誤明皇。
羽蓋霞旂曉日分。隨班共謁玉宸君。衆中獨賜青鏤管。浴月擊雲寫祕文。
蒼蘚如雲石作梯。啾啾終日白猿啼。山君夜守長生藥。太乙爐中六一泥。
雙瞳炯炯映黃眉。喫紙爲驢每倒騎。得啖青雲芝一朵。千年顏色似嬰兒。
阿母前頭郭密香。雲衣常佩虎鞞囊。今朝侍從朝金闕。帶笑傳呼白鳳皇。
廣陵八月怒濤迴。駕鯉驂螭踏浪來。不許波臣迎水面。笑將羽扇劃江開。
蓮花巾子不佔塵。碧落飛行自在身。袖拂白榆歸去晚。一聲長嘯裂青旻。
朱霞片片映瑤臺。月下蟠桃帶露開。彷彿有人嬌似玉。笛聲吹徹紫雲迴。
扶桑樾熟四千迴。金骨飛翔遍九垓。路遇安期前致語。明朝相訪向蓬萊。
玉女峯前是我家。荷鋤日采滿谿花。仙情不比凡情渴。況有千年冰谷瓜。
恨無錦字寄蘭翹。戲躡青鸞上玉霄。爲草填橋烏鵲檄。贈予十幅紫蛟綃。
晴空千仞立青岑。瀑布飛流下澗深。獨坐蒼松無與伴。泠泠一撫落霞琴。
天台分手會何期。海色西風無限悲。欲倩滄洲轉言鳥。好從別後道相思。

神仙亦自有英雄。身跨青驪疾似風。思射天狼清斗極。扶桑枝上取彎弓。
霧縠衣輕盡六銖。花虬七色五雲扶。琅函手裏瑤光散。一卷三天豁落圖。
蓮花寶劍影廉纖。雙袖飄飄拂紫髯。遙望元洲欲飛渡。醉眠水底弄銀蟾。
君山一點似青螺。夜約盧耽控鶴過。喚取湘靈來鼓瑟。月明環珮出江波。
瓊肌蓮臉髮鬢鬢。素手常攜采藥籃。踏破白雲歸碧落。被風吹下鳳皇簪。
千年曾醉岳陽樓。城郭人民感昔遊。煙景歛然看漸滅。一聲鶴唳洞庭秋。
與子逍遙億萬齡。笑伊舉酒勸長星。共談混沌前頭事。雙手摩挲天柱銘。
星窗月戶洞空虛。琅簡輝煌映蕊書。俯視茫茫煙九點。神仙自是好樓居。
月出蓬壺皎若銀。疏星遙隔絳河濱。凌波小襪飛行急。不染人間半點塵。
弱水迴環三島流。望中依約見瓊樓。浮來玉井蓮花瓣。聊當仙人不繫舟。
鴻龍玉狗啓天關。東海團團吐曉暎。一尺紫雲遮帝面。近臣始識玉皇尊。
路入龜山翠不分。藥香煙暖氣氤氳。洗花往往逢谿女。五暈春衣翦彩雲。
涓涓花底瀉紅泉。千个琅玕拂翠煙。愛看月明鸞鳳集。鏗鏘音韻羽衣妍。
碧桃紅杏四時春。嵐彩霏霏踏玉塵。親扣丹扉知客姓。手提如意跨青麈。

銀河爛漫彩雲鋪。桂蓋亭亭映玉壺。寶璐衣香吹滿地。汾祠昨夜祀黃姑。
白鸞塵尾散香來。王母筵中笑舉杯。入夜須然蜃脂燭。燭龍空裏吐樓臺。
玉雞初唱日東升。萬仞蒼厓挂古藤。欲識九還丹熟處。金精黃蠟各飛騰。
海上琳宮次第開。琉璃碧瓦淨無苔。金城莫攪鴉兒睡。盡是猶龍變化來。
蒼茫煙水隔迷津。芳草無風氣自春。別業桃花源一曲。年來賃與避秦人。
凝虛殿裏晚風涼。紅桂花閒映紫房。特召書仙開寶籙。御爐芬馥玉蕤香。
樓閣空中白玉京。飛龍驂駕兩相迎。紫皇敕掌仙官籍。金管親題北斗名。
花裏瑤軒夜不扃。麟毫簾卷水晶屏。娉婷不爲春愁坐。仙語泠泠細誦經。
玉女投壺帝座旁。赤鸞青鳥列成行。脫臯親見天公笑。不信人間是電光。
瓊童雙引五雲車。天路繽紛散寶花。夜靜廣寒宮未閉。吳剛爲我捉金蟬。
散髮青童控鹿隨。昔年曾是牧羊兒。踢翻西海洪濤動。十萬魚龍不敢窺。
雲冠鶴鬢兩瞳青。劍室煌煌錯七星。隻影空山孤月夜。畢方罔兩盡潛形。
崑崙頂上御天風。數粒蒼山眼界空。遙指長安如蟻窟。五陵萬古碧濛濛。
星漢微橫玉漏遲。斑麟輦降辟邪隨。招仙閣外涼如水。只有琉璃扇子知。

翠杓瓊漿細盡歡。銀宮高處不勝寒。太霞一曲歌纔徧。抱得雲和自在彈。
開徧三花樹。樹秋綠雲萬頃白蓮浮。九靈少女吹簫過。玩月同登十二樓。
紫霄無路可先登。雞犬何年亦上昇。欲識蒼蒼非正色。乘風穩跨北溟鵬。
抱一含元道自成。機通衆妙異凡情。世人莫託神仙幻。戲喝蓮花陸地生。
洞天霞彩雜晴嵐。碧樹紅芝映玉潭。園客新分香草種。靈妃無事養華蠶。
衣翦龍紗捫赤緜。名登紫府冠仙曹。王公遣在方壺住。東海何人敢釣鰲。
靈人浴日向丹池。曉看陽鳥出水飛。掠過神洲還入海。江山不改世皆非。
一幅龍綃染絳霞。往來弱水不乘槎。新傳弄玉吹簫譜。寫與緱山姊妹家。
步虛仙唱隔花聞。座上風吹五朵雲。寄語蘭香珍重處。瑤編常把辟邪熏。

樊榭山房集外詩卷中

續游仙百詠

斜界銀河低玉繩。步虛風露冷如冰。月中無數閒田地。更築瓊樓十二層。
貝闕龍堂會衆仙。赤蛟戲水鼓湘絃。一聲裂帛秋波動。驚起江妃不得眠。
青鬢爭捧綠瓊車。紫府眞妃號九華。忽聽鸞笙雲際響。雙成笑隔碧桃花。
玉卮娘子着雲衫。月面星眉貌不凡。阿母膝前梳髻罷。綺窗教展藥珠函。
負輓牽牛曉飲河。遙逢帝子道如何。仙家夫婦皆耕織。好借天田種玉禾。
天上生辰祝紫皇。羣仙齊進九霞觴。太元玉女催呈舞。一曲霓裳日月長。
銀臺金闕盡前緣。玉籍書名豈偶然。竊藥偷桃應犯戒。玉皇破例恕神仙。
三島微茫鶴到遲。峯頭閒倚玉桃枝。要將碧海長鯨掣。繫取虹蜺作釣絲。
風佩泠泠過洞陰。飛仙游戲本無心。小餅貯得瀟湘雨。滴下世間三丈深。
東溟巨浪蹴遙天。浩劫揚塵幾萬年。親聽海邊橋石語。何曾流血被秦鞭。
獨駕螺舟戲水濱。波平風靜月如銀。阿誰江上吹橫笛。水府老龍來化人。

金根經尾玉名僉。赤足身騎八字蟾。曉入通明齊候扇。半空星斗捲珠簾。
羽蓋颺車天際來。武夷山上起樓臺。鳳兒拍板彭昭唱。一曲人間最可哀。
三天最恥作頑仙。祕檢珠囊盡日研。帝有新宮落成詔。書銘拜上彩霞箋。
集真島上手譚池。鶴髮朱顏坐對碁。不遣世人看半局。恐防誤卻采樵時。
挂星槎穩海爲鄉。珠焰常爭夜月光。東到扶桑觀日出。扶桑更比向時長。
海上樓船去已遙。祖龍那得上青霄。下方一點如螢火。道是阿房三月燒。
袖拂羅浮瀑布斜。軒轅相約看桃花。洞中彩蝶車輪大。騎向天邊化作霞。
仙官奏罷返名山。鳳輦天衢一瞬間。武士踏雲紅抹額。真姬曳霧綠垂鬟。
深洞煙霞是太初。石牀晝捲水簾疎。真文一卷虬龍篆。不是人間世俗書。
華山朵朵翠芙蓉。毛女乘風戲碧松。夜靜寒空秋月白。清歌一曲上蓮峯。
天上春光世上稀。休將紅袖換霞衣。遙憐羅郁思凡謫。一墮塵寰尙未歸。
珠佩星冠障扇輪。雲英年小締仙姻。姮娥甘向廣寒老。冷抱蟾蜍不嫁人。
嬋娟玉女駕雲軒。星漢垂空盡可捫。五色雲中仙掌現。巨靈擎出洗頭盆。
海上彈琴一葉船。赤龍倏忽化紅絃。泠泠弄罷水仙調。攪霧挈雲飛上天。

偶向扶桑碧海過。冰蠶近日始生蛾。上元寄語天孫道。織室暫停拋玉梭。
蜃樓縹渺在虛空。貝闕玲瓏落照紅。莫怪盧生尋不見。盡驅三島入壺中。
下絀懸厓上摘星。往來羽服響流鈴。白猿跪獻芙蓉劍。清嘯一聲歸翠屏。
十二闌干十二樓。閒時登望紫煙浮。媧皇補石猶難到。一道銀河入海流。
閨風苑裏一春閒。青鳥銜書報阿環。綠髮細梳三角髻。嗟峨學得海中山。
青松如蓋石如雲。猛虎猶龍洞口分。童子埽花兼汲水。雙雙盡待大茅君。
冰輪碾破滅清光。修月工人斧鑿忙。玉屑紛紛雲際落。西風吹下盡成霜。
面面軒窗敞水晶。瓊筵烹鳳膾飛鯨。洪厓莫漫憂沈醉。還有冰桃與解醒。
彩女遙聽金闕鐘。曉妝初起紫微宮。不須人世長蛾樣。新月纖纖落鏡中。
聚窟洲邊月正高。夜彈雙禮八琅璈。龍王小女親求曲。風曳紅衫上海濤。
神霄爲吏不知年。偶謁金鑾獻殿前。已是世人貪莫厭。休將竹葉變青錢。
駐景何須繫日繩。空歌碧落任飛騰。劉郎辛苦無仙骨。枉費當年鳳腦燈。
塵網紛紛似繭纏。誰知世外有神仙。先生學得癡龍蟄。一覺松風太華眠。
劉綱夫婦住瓊臺。鶴帔霞裙次第裁。看咒庭前桃樹鬪。一株逃向白雲堆。

吹徹參差白鶴鳴。星輿歷歷碾雲行。廣寒仙兔舂靈藥。丹桂香中玉杵聲。
錦字空中鳳口銜。靈風吹冷五銖衫。相招直渡天河去。片月爲舟雲作帆。
南嶽夫人道貌姝。新收弟子字花姑。碧桃紅杏天邊有。曾見瓊花一種無。
萬里清風萬里霞。一重樓閣一仙家。不知何處飛來鳳。啄落梧桐滿樹花。
皎潔秋空碧瀼澄。玉闌曲曲盡堪憑。雲中何處聞雞犬。昨夜旌陽拔宅升。
雪藕交梨閩苑栽。蘭香生日智瓊來。麻姑遣送行廚酒。張碩何曾飲一杯。
倒景樓臺曉氣分。珠簾掩映紫微君。侍兒閒取天衣曝。下界爭看五色雲。
星斗宮中月鏡開。妝遲不待玉郎催。今宵織女成花燭。簇擁仙娥去看來。
殿角風生金鐸捲。霞光萬縷射虹窗。王喬無事吹鵝管。驚起花閒鶴一雙。
弄電行雲無定蹤。海天空闊有誰逢。茫茫萬里蓬山雪。無數仙人跨白龍。
方丈山邊十畝餘。羣仙相約共揮鋤。秋來種得靈芝熟。卻喜天倉不索租。
毛節朱幡事偃佺。餐松餌桂已忘年。天邊日月何曾落。只繞崑崙左右旋。
閭闔門前五嶽朝。海神輸貢有蛟綃。奏餘七日鈞天樂。賞盡纒頭十萬條。
雲階月地發天香。燭夜花前共舉觴。使酒忽翻青玉案。列仙拍手笑清狂。

進饌擎杯滿碧空。玉清高宴紫蘭宮。歌塵灑徧瑤姬雨。舞袖招迴少女風。
曼倩歸來十八年。黃冠白袷故依然。追隨翠水瑤池會。還是談諧謔衆仙。
綠樹都栖五色鸞。藏春仙隕不知寒。棗花桃核尋常物。只食金膏九轉丹。
橘中對奕各欣然。笑別巴園直上天。贏得一雙龍縞襪。躡雲踏月不曾穿。
嶽蓬仙子字幽蕭。一霎秋空冷佩飄。報道龜山金女到。拜時墮卻翠鸞翹。
一種三清旌節花。移根還自地仙家。玉書敕賜青童捧。爭擁韓終白鹿車。
琉璃宮殿水精簾。桂影榆花夜色添。寒氣逼人偏獨坐。玉肌那怯雪羅纖。
紫雲娘子擅才思。吸露餐風姑射姿。霧閣雲窗人不見。衍波箋寫曉寒詩。
閃斷芙蓉翠羽旂。雲中鶴駕不停飛。孔昇後乘誰同載。豹尾竿前是玉妃。
嵩高夜靜月明孤。石冷泉香九節蒲。聞道叔卿騎鹿到。王興峯頂笑相呼。
水仙去謁洞庭君。珠箔瑤窗寶瑟聞。最笑座中窮柳毅。纔攜龍女便行雲。
芙蓉城裏五雲樓。夜共瓊英跨鳳遊。爲報石家多置酒。玉宸新拜醉鄉侯。
萼綠安香坐玉階。藕絲裙覆蹋雲鞵。衆中鬪得金光草。輸卻雲鬢玉燕釵。
生洲飛步拾紅蘭。金醴餘醺尙帶酸。袖裏盛將滄海月。夜深驚起玉龍看。

新授華陽司命君。青旄紫蓋氣氤氳。碧瑤箱鎖飛仙印。一軸三霄九錫文。
碧雲城外砌玻璃。登望蓬壺小欲迷。誰喚老蟾歸海底。桃都山上一聲雞。
居巢笙響晚風和。忽聽雲中度玉珂。卻是伶倫纔謁帝。相將嶰竹倚清歌。
青霞爲佩月爲鈿。獨坐花陰謝自然。一卷黃庭纔誦罷。玉爐猶有未銷煙。
函谷東來路渺茫。流沙西去似天長。而今講道中黃闕。猶湧成都玉局牀。
邀得青牛駕鈿車。椒庭列坐酌流霞。仙人舞罷山香曲。落盡滿庭琪樹花。
羸娥舊是鳳樓人。飛雪丹成不肯勻。笑語蕭郎天上樂。玉簫占得幾千春。
雲表真人絳節回。水中仙子綠窈開。梅姑繡履乘潮去。江女珠璫弄月來。
窈窕青童鬢掠鴉。翠簾不捲煮仙芽。夜深天母裁宮錦。半是紅雲半是霞。
蟠桃一熟歲三年。纔是雲華攜髻年。底事驚心封不住。花閒故惱鳳皇眠。
落盡殘星海色明。天風浩蕩卷霓旌。朝元跨鶴歸來曉。霜冷石樓鐘自鳴。
冰簟瑤牀夢乍醒。玉童持簡進雲屏。上方割取乖龍耳。種出鍾山李似瓶。
羣玉山頭策府開。羽陵粉蠹化香灰。瑤篇寶軸三千卷。穆滿何曾解讀來。
九館仙人拜大夫。射烏斫兔盡癡愚。長生錄上添名字。只得龍髯第一珠。

島上瑤宮罩碧煙。繞山弱水浪翻天。羣仙盡駕鸞輪渡。獨掉蓮花破鐵船。
青瞳綠髮老浮邱。常想飄飄伊洛遊。今夜緱山明月好。鳳笙吹過碧雲頭。
仙膳琳廚翠釜香。眞官惟奉紫清皇。已攜北斗斟天酒。更弄南箕簸玉梁。
百丈長虹繞繡楹。半天風雨散班聲。紫宸闕下晨趨出。東望咸池拜日兄。
仙娥結束學嬌嬈。裊雪縈煙一尺腰。東海冰綃雲漢錦。九光燈裏舞衣飄。
俯視青冥啓笑顏。蟻封隱隱九州山。滄桑更變成兒劇。杯水盈虧一瞬間。
大羅天上色空青。嘔雨雲鬟躡鳳翎。正遇玉京仙史至。乞將羅襪爲書銘。
朱陵洞底透湘風。乳滴仙花蝙蝠紅。玉簡書投蒼水使。青虬騎入古潭中。
司書仙女號文姬。臉帶霞痕不埽眉。召寫玉樓新記畢。譔文名署隴西兒。
天風颯颯雲盤盤。麗英夜戴晨纓冠。前驅九龍十二虎。絳河清淺生微瀾。
雲翹攜手夜相偕。仙樂泠泠作隊排。月府星垣盡宮殿。琉璃一道是天街。
一片青霞渡海來。神山下見紫瓊臺。綺窗雲影呼鸞起。花裏洞門深自開。
杖頭拄破白雲痕。離地天通有一門。猿鶴蟲沙飛劫盡。茫茫何處覓曾孫。
御風微縹碧煙裙。笑翦湘天吸彩雲。遠望層城花靄靄。駕虹去拜紫陽君。

霞漿一勺鎮青春。猶戴華陽道士巾。游戲尙嫌瀛海窄。更鞭鸞鳳叱黃麟。
夜向蘂樓邀小玉。傳書鶴使路迢遙。忽聞阿母多呼喚。閒殺仙郎碧玉簫。
鋤雲種得玉爲田。服食瓊腴凌紫煙。曾向梯仙國中住。吞殘紅日不知年。
珠閣深深鎖上華。瑞雲繚繞綠窗紗。忽驚吹落沉檀雨。盡是羅天四色花。
餐霞爲食枕雲眠。種得峯頭十丈蓮。不是凌風生羽翼。塵凡那解識飛仙。

樊榭山房集外詩卷下

再續游仙百詠有序

曩作前後游仙凡二百首。前游仙已雕板。不揣荒鄙。頗有嗜痂。後游仙藏篋中。未舉示人。暇日展玩。自愧凡俗。於仙境猶有未盡。因刻意冥搜。誓脫故常。復成百詠。昔謝逸作蝴蝶詩三百首。人呼爲謝蝴蝶。世有知我者。其將以予爲厲游仙乎。

宴罷瑤臺酒半酣。海天一色染微藍。蓬萊頂上麒麟客。界破滄溟碧玉簪。
香風吹散紫梨花。拂過瓊宮桂影斜。空裏銀光似流水。潛翁夜弄白蝦蟆。
神馬生猶控玉童。三回繞日勢追風。王公噴喫芝田草。新種龍芻翠島中。
阿母親教嫁玉郎。鸞輪吹送杜蘭香。璿宮織得秋雲帕。裹贈瓊丹似紫霜。
夜宿明晨八景城。眞香焚盡說長生。琉璃牆壁不知夜。白鳳玉鸞都暗驚。
騎羊拂袖上綏山。朱草紅蕤滿路斑。折得金桃未曾食。東風笑待赤烏還。
髻綰飛仙青錦裳。闌風筵上舉金觴。不知傾盡瓊蘇酒。嚼爛紅霞睡阮郎。
乘風笑踏玉蟾蜍。訪道參師遍紫虛。琅碧溪頭桑樹下。飛龍親授太霄書。

玉貌壺公翠彩眉。碧桃花發遠相期。騎來白豹偏饑渴。教飲紅泉啣紫芝。
太極夫人插玉釵。紫清宮裏候清齋。忽逢歸路雲霞重。擁住青瓊飛鳳輦。
白羽霓幢一色新。八溟山上校羣真。青虬扶輦裴君至。金簡新除侍玉宸。
負局先生綠髮長。曳雲瑤佩韻丁當。只因磨得姮娥鏡。白兔傳將搗藥方。
一片真風花氣飄。三層玉殿近彤霄。何人低唱元雲曲。聞道東皇散早朝。
碧霧衣裳青羽裙。蹇鸞道是紫元君。欲過蕙圃尋瑤草。早有香來透五雲。
鬱鬱紅雲鎖翠樓。玉璫敲戶暫來遊。階前白鷓閒教舞。狼藉芝花曉未收。
迎來玉仗白羊公。手捧龍泥碧檢封。夜扣九關門尙閉。滿身星影立雲中。
昨夜元洲降碧霜。綃衣新染十分香。千年白橘初成子。未獻真妃不敢嘗。
碧谿流水泛雲花。此是滄浪少女家。夜向瑤池思阿母。祥風吹上紫鸞車。
輸寥館裏小天青。夜誦金璫玉珮經。侍立瓊童無一事。隔花閒數絳河星。
喚起青龍駕玉鞭。井公相約到瓊田。圍碁一劫三千歲。贏得桐山度厄錢。
長桑公子服紅冰。閒向崑崙試一登。三十六天花底見。瓊樓玉宇碧層層。
金尾毳毼鳳哺雛。滿衣紅露落如珠。靈香只在闌干外。雲母屏空看似無。

弱海相逢袂便分。欲將書札寄王君。須邀班孟嚼雲墨。噴紙盡成瑤篆文。
金波一片海光生。天路常隨六甲行。白虎鼓琴鸞唱曲。勸君須盡九霞觥。
冰裳染得萬峯青。瓊樹風高吹夢醒。碧海水邊洗明月。滿天星斗冷冥冥。
靈壽青童偶共攜。翠龍雲冷臥前谿。紅霞蒸透桃花樹。不覺玉山歸路迷。
空洞笙歌奏六音。碧堂迴繞五雲深。虛皇親召金妃舞。花鳳前頭拍不禁。
瀛海波高雲影寒。方平夜戴七星冠。麒麟本是尋常物。祇供行廚作脯餐。
淺碧壺天扣不開。瑞煙長護七靈臺。青田鶴使先通信。知是八元仙伯來。
鞭鳳來過日未斜。鄰鄰碧水護金沙。倚風一吸蒼龍炁。開盡蓬萊紅杏花。
王公留客啜霞漿。洞裏春閒白日長。歸去天風刮雲響。吹翻紫水污衣裳。
月影霞光亂不分。煙衢輕蹴玉絲裙。九芝蓋底遙相望。不是茅君定許君。
金書親賜住瀛洲。曉喚芸童到上頭。芝穗藤花須細掃。玉皇明日要來遊。
萬年青鹿七星毛。騎出谿頭摘碧桃。背後從行雙玉女。煙絲新刷翠鬢高。
風雨冥冥碧玉壇。元洲長史近闌干。草成河伯新除詔。賜與黃龍潤筆乾。
青谷先生隱太清。朝元初罷返瑤京。不知何物充朝膳。爛煮金蔬玉菜羹。

碧紙琅函一幅書。相邀涓子到方諸。往來不用三青鳥。自有騰空赤鯉魚。
玉苗瓊藥種來新。多是寥陽殿裏人。只有碧池無景色。鮑姑乘雨送香蘋。
藥珠樓閣壓紅雲。侍女燒香遠近聞。新到仙姬參拜了。教開青笈賜真文。
九雲冠上綴三星。小字曾呼宛絕青。吹裂中天寒玉琯。白龍斜立碧煙聽。
月戶珠簾上玉鉤。青琴仙子夜深遊。冰絲彈得清商曲。吹下人間萬木秋。
玉母生辰捧玉杯。酒清香發上瓊臺。鈞天初奏掀雲外。九聖七真騎鶴來。
晝長懶去展琅函。小洞花前玉手搵。搓碎明霞壓紅綫。安妃喚繡鳳皇衫。
秋到寒蟾彩暈明。五雲深處桂香生。跨龍飛過清虛府。聽按霓裳第幾聲。
天葩不與世間同。樹樹長春一色紅。更有紫河香十里。荷花開向雪霜中。
羣真直宿紫微旁。宣召明晨夏侍郎。擡起五雲簾一半。霞衣染得九天香。
教炊金竈煮胡麻。雲樹重重是妾家。一別劉郎無近信。洞中冷落碧桃花。
月明花暗路遙遙。玉女閒吹九鳳簫。等得裴郎就鸞駕。穿煙珍重謝雲翹。
新拜蓬萊佐命卿。玉童羽蓋往來迎。夜探笑倚青鸞背。拏住金蟾不放行。
瑞霞爛漫八風涼。絳闕門前下鳳凰。不許侍兒敲玉節。恐教驚動紫清皇。

青翁爲厭侍瑤京。移住西明三素城。買得瓊腴田萬頃。閒時卻喚玉龍耕。
幾度看生滄海塵。風前倒着紫綸巾。碧驃何事不歸去。水滿玉谿瑤草春。
小有君王跨鶴過。洞天雲滿露香多。花閒衆女調笙琯。正唱春波一曲歌。
記得雲軒過海時。水平風靜碧淪漪。白螺素女來相候。擎出明珠龍不知。
空裏飛書寄洛公。雲箋吹落碧天風。海波爲問曾乾否。要種金桃萬樹紅。
太素真人不出遊。瑞花瑤樹隱丹邱。眠雲野鶴夢纔覺。已是人間千度秋。
新壓瀛洲碧玉漿。麻姑作主共傳觴。紅鸞飲罷催歸去。爛醉不知風露涼。
洞裏瑤窗六扇開。落花一片繞谿迴。熊盈娘子閒何事。親把黃金搭襯裁。
七瑤宮裏賜金花。一道明河簇絳霞。只有成公親被召。相隨帝子降鸞車。
山圖寶馬錦障泥。歷遍崑崙弱水西。日暮搖鞭歸紫府。瑞雲影裏一聲嘶。
九天風冷月茫茫。吹薄龍絲一握香。碧落夜深秋似水。來邀青女覓甜霜。
新梳一尺綠雲鬢。嚼蘂餐花盡日閒。阿母爲嫌塵世窄。智瓊無奈憶人間。
著罷青裙拜木公。洞天十二碧玲瓏。雲窗女伴暗相識。知是西池白玉童。
弱河風靜浪千層。一朵青霞自可乘。拍手笑呼鳧伯子。同遊翠水采秋菱。

清瑟閒彈五十絃。雲心飛響瀉流泉。無人解聽紫霞曲。鶴唳鸞吟月滿天。
雲輶深擁魏夫人。前導雙雙五色塵。忽見桃花開海上。三千年又一回春。
珠館春寒鎖玉屏。落花飄著上清衣。金盆曉漱寒瓊水。灑向人間作雨飛。
瑤樹離離月色明。偶隨煙駕宿三清。花間一夢誰驚醒。北斗迴環夜有聲。
碧苑青林一半閒。尋常移得麗農山。曉來怪底雲衣溼。添卻窗前綠玉鬢。
八公顏色似桃花。共坐青牛白鹿車。欲訪故人何處所。雞鳴雲外是劉家。
茶姥烹茶別有方。東皇留客試教嘗。玉壺不住雲霞沸。煮出瓊華滿盞香。
玉案旁邊小侍書。金鑷雲髮一頭梳。朝來檢錄三天事。密記琅玕滿碧裾。
昨日騎魚白海過。采桑陌上遇青娥。自言厭著天孫錦。要織冰綃共雪羅。
閒采雲山紫葛花。露苗煙蘂月初斜。饑時白石和泉煮。飽向峯頭漱曉霞。
安公朝謁玉清歸。脫卻霞霄無縫衣。騎得赤龍何處去。閒遊一任九天飛。
一曲滄浪別有天。玉花金草滿瓊田。連朝鳳駕雲輶倦。聽向扶桑背日眠。
蓬君年少最風流。新賜天花插滿頭。笑指紅雲歸去路。玉華正倚十三樓。
曉喚青鬢煙景殊。瑞煙溼透紫羅襦。東華宮裏春常在。撲地香雲何處無。

夜宴瓊臺飲未殘。星河流響近闌干。燭龍早向東方駕。照破玉杯春酒寒。
昨夜相邀宿月宮。素娥玉珮響丁東。白鸞作意婆娑舞。身在琉璃世界中。
碧樹風清拂玉虛。八靈道母鎖雲居。明朝欲約蓬萊會。夜寫青瑤小篆書。
一笑騎鸞下碧城。偶然相遇帛先生。東風不記何年別。揜袖爲君吹玉笙。
瑤水如空噴錦沙。客星無路可通槎。醉噴一隊長生鹿。銜出洞中紅玉花。
西華侍女董雙成。閒共蕭郎作伴行。贈與千年駐顏藥。願郎珍重莫嫌輕。
一片空歌入太微。月寒花露滿身飛。玉妃悄向青童語。遊遍煙霄侵曉歸。
芝甲瓊花發好春。衛卿許椽最相親。全家容易登霞籍。不比人間學道人。
雲林洞口晝冥冥。鶴睡瑤扉靜不扃。莫道往來煙路遠。碧天只隔水晶屏。
紅霞爛爛染衣裳。回首滄溟路更長。爲覓董君相借問。不知杏子幾時黃。
夜上樓頭碧霧空。寥天吹動八絃風。飛瓊笑拍闌干望。月殿雲階倒影中。
姑射真人戲紫霄。天風冷襲綠雲袍。玉皇遣降豐年雪。都向青鸞羽下飄。
采棋因過碧海頭。興來嘯父喚同遊。晚風更上崑崙頂。鐵笛一聲無限秋。
齊隨霓節上瑤壇。絃管泠泠奏未殘。獨有茅君親拜賜。衆中暗認藕華冠。

去覓元君偶被留。玉膏千斛校觥籌。更呼小鳳筵前舞。月轉河傾不肯休。
湘鬢催喚范成君。結束彤雲六幅裙。教唱步元新法曲。此聲天上未曾聞。
花開花落本須臾。直得霞翁一笑無。眼看扶桑東海上。幾回生葉幾回枯。
青林紫草伴長春。不識人間有笑顰。欲取水中龍子戲。湔衣因到玉谿濱。
手翻鸞珮下金臺。寂寂雲窗午未開。正是紫妃新睡覺。聞聲始識鳳仙來。
雲箋五色展青箱。詔寫瑤鑄向碧堂。龍篆芝書人不識。墨花飛出滿天香。
渡水乘花共踏歌。頽雲高髻碧戎裝。戲將玉尺量東海。更比當時淺許多。
鳳輿海上卻回時。青鳥傳書寄所知。我有遊仙三百首。不須重唱駕鸞詞。

樊榭山房集外詩題識

曾侍東皇太乙前。酒龍謫下不知年。花陰一覺游仙夢。行遍壺中小有天。

噓吸乾坤瞬未移。下窺濁界息相吹。海流不到天無底。始信三山未足奇。

西溪漁者自題

游仙詩三百首。蓋先君子少作也。以偶爾託興。未嘗實版集中。小子黼薰襲篋衍。每一敬展。手澤如新。泫然何已。同學鮑君以文。績學嗜古。亟請開雕。不特敏求之足當。實爾詩人不匱之遺矣。黼其能無興感哉。謹書末方。以識鮑君用意之厚云。乾隆辛巳中春。志黼識于樊榭山房。

樊榭山房集外詩

六月一日集十研齋蔬食。期芟上人不至。分得粉字。

積雨潤方收。初夏勢已蘊。山僧結夏期。我輩服食謹。丈人靜者流。解菜鄙饑吻。入市匪求益。行園土膏墳。瓠鴨及楮雞。羅列費拾攬。相招同此味。意與信民近。飽餘沃以茶。意洽色無慍。勝彼山中人。但啜雲母粉。

題范寬秋山過雨圖分得頂字

小山別大山。秋聳青挺挺。不知涼雨過。微雲滅修頂。千年華原筆。魂在誰喚醒。石劒挂天紳。亂響入清迥。村沽樹懸幟。荒塗馬旋灣。落日臨長川。喚渡苦無艇。牽前復鞭後。人馬俱沒脛。踰時役爲勞。卽次旅難並。回首數峯坳。朱萼遠光炯。

十硯齋銷夏賦一字至七字詩分得井字

井。清。深。甘。冷。梧。院。陰。苔。整。靜。雪。走。連。筒。泉。飛。修。綆。曉。漱。碧。生。華。午。麩。涼。聚。瘦。一。規。漢。苑。秦。宮。千。尺。柳。汧。葛。嶺。只。應。時。有。墜。斂。人。白。苧。衫。輕。低。照。影。

二月八日登弢光

入林寒尚在。宜蹋最高層。亂水醜叢竹。春陰護一燈。卷留前代句。塔葬舊房僧。尙想連牀宿。幽雲畫不能。

銷暑小集分得蘿字

蒙密同烟荔。如聞楚九歌。垣衣牽碧障。松幘挂青蘿。漏月一潭暗。飛陰三徑多。緇塵吹不到。幽絕此山阿。

讀史十首

金源一勺水。時事百年過。飲馬鴛鴦灤。揮戈鴨子河。運移寶鐵壞。國附活羅多。可惜平陰路。西樓計轉訛。入汴知何日。青城氣寂寥。怨軍降北塞。子帝立南朝。割地終無補。渝盟未可要。茫茫天水碧。歌舞一時銷。海陵南下日。江介想投鞭。小別諸妃位。初徵新戰船。筆來庾語洩。醫諫姓名傳。拊髀知天命。先書大定年。川擅金蓮號。林居橫翠閒。千旗發春水。萬騎至秋山。興極籠鷹去。歡呼射柳還。西風故鄉曲。憑仗好開顏。瓜步三軍駐。符離百戰場。乞和因象祖。函首送師王。天意全羸趙。人心守舊疆。銷金鍋子好。君相且奢荒。初設明金禁。還爲擊鞠游。瑤池殿名暄。景霽香閣午。風柔冶服逍。遙玉伶人玳瑁頭。鳳皇飛向裏。巧笑發輕謳。

文獻中原舊。波瀾劇老成。清詩元好問。小篆黨懷英。居得黃華勝。王庭筠篇傳矮柏名。李純甫諦摩龍什在。諱

宋見平生。王予可

異代元真子。居然烈士風。寸心存趙氏。早歲識蘇公。長揖軍門下。高眠滄海東。北轅嗟已矣。流涕恨塵蒙。

亮褚承

宣宗亦南渡。草草到中州。嗚咽青山轉。淒涼汴水流。監軍多掣肘。強敵得無憂。和議仍前轍。應添上國羞。
青山轉。汴水流。當時二諺。

孟珙懸軍入重圍。天地昏空歌江水曲。不返蔡州魂。虞虢雖朝暮。興亡有本根。雪香亭上月。終古照梁園。
早起納涼

懶散腳不襪。起來池上行。露荷喧雨過。風竹學泉鳴。書續宵燈讀。茶催曉汲烹。漸看新日上。屋角已先明。
送子珍之睦州

故人新定去。別我雨冥冥。湖海須強飯。風塵尙轉萍。秋山臨夕渡。孤棹指前汀。牢落無勞歎。雲林何限青。
自秦亭山至法華山作
山下十八里爲宋時幸洞霄宮輦道。

數里晴峯色。誰知輦道荒。茗花隨地白。毛竹隔溪黃。烟磬連樵響。風泉滿夕陽。屬車思豹尾。松柏久淒涼。
永興寺

曉踏石頭路。幽尋不礙回。連峯緣徑轉。香國隱花開。修竹流疎磬。長廊徧古苔。翔禽白如雪。知是看山來。
雪中答子珍睦州見寄

縈盈復紛糅。新雪暖鑪前。忽枉瑤華贈。能令幽思傳。寒聲嚴瀨水。曉色定山烟。何日偕桑苧。來尋十九泉。
元日重游南湖慧雲寺

初地春風早。重過水一方。祖堂連野色。佛屋漾湖光。松靜蒲牢吼。花寒狒獼裝。向來游眺地。上日倍相羊。
晚步池上

蕭條吾最愛。取次繞池灣。水老萍千點。天空月半環。畏寒魚自定。識暝鳥先還。漠漠生烟裏。誰知此境閒。
送徐紫山之廣州

非關爲別易。兩地榻仍懸。白髮人過嶺。黃梅雨上船。名齊高士傳。興在遠游篇。歸踐羅浮約。丹砂訣可傳。
徂徠山

徂徠初在望。杳靄上朝暾。山雪中無路。松風下有村。孤懷六逸往。直節一詩存。欲去屢回首。遺蹤傷客魂。
城東郊行

落日在城上。行隨一水斜。望中惟樹色。意外有人家。江雨初收麥。籬風小摘瓜。野情非共適。那得此清嘉。
聖因寺大恆禪師。以龍井茶。易予宋詩紀事。眞方外高致也。作長句。邀恆公及諸友繼聲焉。

新書新茗兩堪耽。交易林閒雅不貪。白甄封題來竹屋。縹囊珍重往花龕。香清我亦烹時看。句活師從味
外參。舌本眼根俱悟徹。鏡杯遺事底須談。白香山有鏡換杯詩

偶見叩頭蟲戲詠

窗閒壁駁響方空。躍處翻身技便窮。何物始能通叩叩。可憐應只有蟲蟲。手推一下朱門裏。心疾多生翠

幌中莫訝微形偏善媚。由來強項本難工。

獨游雲居寺

病眸愁鬢怯登臨。古寺空山偶獨尋。落葉滿城迷磴道。片雲穿塔下湖陰。多花佛地何妨住。無客禪關不厭深。日晚蕭蕭天籟起。微風吹作妙聲音。

同蔣靜山游報先寺

寶界人傳八百年。高低石徑到門前。離離風葉莊嚴樹。薄薄霜雲玳瑁天。愁豁始知禪有味。眼清更覺野無邊。偶來不爲尋僧至。斜日蒼茫下亂烟。

玉几惠鄂州小集率賦寄謝

薄寒淒淒欲中人。八行千里見情親。楊雲空自矜書色。最是捻來觸手新。光堯內禪萬靈趨。蓺祖孫曾一線扶。誰識書生談帝統。過于河洛會昌符。

古宮詞

禁近秦淮暮靄凝。昇元寺閣影層層。玉梅花裏瑤光殿。雙著袈裟拜寶燈。唐南
內苑宣華錦幄溫。牡丹紅襖照金尊。酒悲莫向尊前諫。已起更衣瑞獸門。王蜀
摩訶池上暗香多。水殿涼生笑語和。親製填詞教侍女。玉肌無汗冷輕羅。孟蜀

南薰殿暖晝燒香。蛺蝶裙拖窄地長。共進樓羅新樣歷。唱名第一得花王。南漢
月到瑤階漏點微。九龍帳底夜珠輝。小鬢背檻私相語。何事歸郎不肯歸。閩王
宮嬪車子趁新晴。去看臨安衣錦營。緩緩歸來春正好。杭州楊柳有啼鶯。吳越

楊柳枝詞

玉女窗前日未曛。籠烟帶雨漸氤氳。柔黃願借爲金縷。繡出相思寄與君。

六月十二日同樂城谷林集湖上

風翻十里綠雲斜。隔斷孤山處士家。坐愛片雲無住著。頻移涼影過荷花。右三十七首見杭郡詩輯。

九月晦日柳漁招同龍泓竹田甌亭湖上看芙蓉分韻得山字

秋花爲我破愁顏。好在金沙碧水灣。幾簇風亭紛掩冉。一枝烟艇與迴環。狂呼太白裁宮錦。嬌□文君襯
遠山。只此便堪驅俗物。可人雙鷺冷飛還。

意林以高唱二絕送蠟梅次韻奉謝

約略明心破臘寒。蜂鬚未肯點微檀。想君用意冰霜裏。不別花人不與看。黃梅以磬口素心爲佳
願嫁山茶正病時。佛裝分映佛前枝。春前一種橫陳味。鼻觀微參只自知。

題秋軒先生蕉窗學易圖

秋窗疎雨漏蕉喧。中有幽人味義根。雨响蕉聲一時寂。始知易妙是無言。右四首見丁竹舟申所藏詩箋。

秋日游城北興福寺

宋薛左丞昂捨花藥園爲寺昂乃附蔡京者

亂竹疎花覆石缸。虛廊自聽足音登。塵中年事堂堂過。禪外秋心嘿嘿降。八丈舊游空藥圃。

蔡條鐵園山叢談稱昂爲

薛八丈

萬回遺笑掩經幢。朱弁曲洧舊聞薛昂和蔡京車駕幸第詩有拜賜須臾應萬回太學生呼爲薛萬回賢愚至竟皆陳迹。付與滄洲白鳥雙。右

一首見魏性之本存所藏詩箋。

餘杭道中

相近餘杭道。山川似永嘉。樹寒烏挾子。地煖薤生花。碓舍水春急。溪門網曬斜。他年如卜築。便種故侯瓜。

題楊山水閣

水檻天然好。真成漫叟居。芙蓉三品鳥。蒲葉一雙魚。隱几時無事。焚香復晏如。緇帷有漁父。更憶漆園書。

送人歸灞山

漢帝祠南岳。還封天桂山。翠微終不改。玉檢久應閑。君住皖公下。青蒼對掩關。鱸香秋盡後。歸去聽潺湲。

過宗陽宮是南宋德壽宮遺址三首

曉入曾城路。蕭閑水木饒。松涼人氣健。殿迴露華銷。無復金輿駐。依然絳節朝。白頭逢道侶。指點話光堯。
甃石通橋道。當風上古臺。山蟬吟不斷。林翠拂還來。泉想虞琴奏。蘿疑御幄開。登臨思內禪。浩劫使人哀。

贖訝神山失。蒼蒼片石存。莓苔鏤古色。風雨護雲根。遠貌飛來勢。空歸衆妙門。東京共蕭瑟。莫問玉真軒。

雪後寶石山二首

林坡犖确如香篆。湖色沿洄似玦環。瞥見郭熙小平遠。斜皴粉墨寫寒山。飢鳥接翅上觚稜。一面青山塔七層。塔院微鐘斷烟火。耐寒猶有赤髭僧。

南湖早春

撥藍新水拍湖堤。側帽年年路不迷。盡日無人窺影處。蜜梅花發竊黃啼。

臨平湖竹枝詞

雙鬢十五盪舟徐。不見清波錦鯉書。儂似湖中石鼓攏。望郎望似蜀桐魚。

朱壁溪山釣雪圖

斧劈山色雪雲淡。不了樹枝黃葉稀。月波樓下吹笛去。絕無人影披簑衣。

坐學士港小橋望隔湖諸山

平生最愛郭熙語。春山如笑心所耽。秋山如妝更佳絕。境不親遇思潭潭。路紆港狹暗門外。兩岸樹老多楓柟。秋聲萬竅發。篋瑟黃葉飛墜前。林龕陡出港口目盡豁。湖面百頃朝光含。青山有意在隔岸。狀態始得窮幽探。馮夷苦欲獻窈窕。風伯爲我驅浮嵐。穠花穉柳亦何有。朱粉已謝東家慚。或浮亭亭遠在北。或

立挺挺偏依南。陰晴重掩不可數。一一碧玉蓮花簪。誰能水上見微步。宓妃湘女遙相參。坡陀中更橫秀嶺。首尾儼儼形眠蠶。欹斜斷處遠岫出。眉際小缺微填藍。石梁坐久劇平視。口不能語心能諳。須臾殘日射滉漾。金支彷彿蛟宮涵。漁舸遠列若鳧雁。敗荷蕭索聲微酣。似聞有語勸小住。欲築汀畔爲漁庵。右十二首見裨勺。

題新修雲林寺圖爲巨濤和尚作一百韻

擅秀明湖曲。鍾祥竺國鄰。瀾分龍蚺螺。峯聳鷲翹翹。洞古聽猿嘯。巖迴得虎馴。覽流空際雨。花界定中春。裁宇原依晉。緡經漫數秦。略丞吟海日。達叟弭濤神。樹識西天栗。叢標北戶筠。崇基先薙草。表刹屢揚塵。兜率英規在。嶠閣異跡陳。聖朝恢正教。尊宿導迷津。謂具德和尚白業韃椎妙。青霄結構新。金繩除劫燼。寶網闢荒榛。簷翼翔霞外。亭楣揭水濱。禪棲何眇眇。信鼓更醫醫。億衆持芳饌。丞徒侍氎巾。邛隆當繼治。皇豫歷時巡。雉扇松門轉。鸞鑣柰苑遵。奎文通八解。睿藻照三身。壑迴吹仙籟。雲深拱紫宸。傳燈誠有數。憩錫亟需人。獅座安逾甲。鯨鐘叩過申。梵檠隨雹落。丹粉共霜泯。嵐暗諸天像。山悽禮塔民。中興看慧命。大事問前因。一鉢來京口。雙旛駐澗濱。巨公丹徒人經營閱臙臙。檀施歎酸辛。洪願匡緇侶。清修感上賓。寓公延杖履。至誼本慈仁。謂汪光祿萬松發甕書函悟。登階覺地親。宰官今世現。長者夙緣伸。須達應同號。伽陀更不磷。蘇家金罔吝。和氏璧非珍。廣度毘尼戒。宣揚如意輪。荆襄輸梓杞。吳越召陶甄。九乳雄樓峻。千香傑閣勻。晬

容臨丈六紺殿測由旬。締造蹤仍舊。莊嚴力與均。朱甍舒鳳翅。雕砌螭蚪鱗。拱畫拖虹彩。楹形麗燭銀。風
琴鳴霹靂。岫幌映紛綯。台岳尋靈驗。高堂拜應真。屋環田字樣。材藉匠師掄。劉塑形疑活。曹衣摺似搢。攝
儀齊儼肅。列坐若嶙峋。相好唐兼梵。魔摧喜復瞋。以上敘度戒僧六百。建轉藏殿。鐘樓。梵香閣。重修大雄寶殿。田字殿。塑五百羅漢像。僧坊閑並飾。
靜院隙重紉。剝腐爨樞具。傾欹板築頻。園開蓋叢菜。唐庀睦州薪。浴牖朝初換。齋庖午最振。孟嘗留取鑊。
子敬指餘園。改范勞良冶。精銅聚令辰。飛廉欣搆炭。屏翳怒融銀。爐啓圓穹蓋。泉投萬斛蟻。湯蓮炊漱灑。
玉粒漲隣甌。法食充虛腹。馨聞動佛唇。精乾寧委土。米汁可行輪。以上敘修禪堂寮舍。及重鑄香廚大鍋。勝境奚煩擇。程功
尙未竣。逶迤鋪澀路。次第補堙隄。岸峭幽淙駛。橋堅暮靄屯。鏡匳搖繡桷。波底涌華振。望景眸爭鷺。朋遊
趾集廡。到遲尋月桂。去便詠汀蘋。婦孺瞻彌切。焚修浴倍淳。魚王方溯澗。蛇種亦歸閩。核果供摩勒。芰菱
獻屈胸。浮圖楊銜記。灑埽宋雲論。以上敘砌寺外路。築石門澗岸堤。及修冷泉亭。新建迴龍橋。春淙亭。慨彼稱懸薄。惟知巧算縉。涼軒淒象
簾。燠館熨貂茵。么鳳偏教舞。妍蛾雅試顰。膳夫殫瑣瑣。酒史棄諄諄。寵勢謀攀竇。賢名肯友荀。霍奴驕使
氣。鄧析訟連孀。輦賄填溝壑。輸寶謝主臣。竟令空室敞。豈植福田畝。智讓生生鳥。心慙趨趨媿。渡江誰弭
楫。旋里有紆紳。粟濟翳桑餓。囊霑庇葛貧。膠庠甦涸鮒。襦袴逮垂鶉。稅代償逋戶。財堪慰厚窀。榮加卿寺
秩。譽借比閭詢。社櫟纒辭歛。陔蘭適守鄞。時光祿令嗣。出守四明。善根簪紱盛。淨域煥巍臻。震旦傳無盡。恆河永弗
涇。中丞揮巨筆。太史染貞珉。落成時。大中丞常公撰碑。文侍讀鄭筠谷先生書丹。璣貝頌遺哲。壇幢萃此晨。還將東絹滑。細寫素毫

純。小李堆濃綠。迂倪暈淡斂。鬢頭摹碧潤。石腳渲蒼嶂。點綴稽留躅。微茫帝釋儻。郭髯推界畫。范緩出闌楯。影矗琉璃道。煙橫舍衛闌。四圍羅夕牖。百丈倚秋旻。八部楞迦肖。珍池長壽倫。面羸休類莧。腕勁欲揮尊。繞磴森梧竹。周墀雜葛藤。徐熙赤鸚鵡。韓幹白騏驎。絢合驚懷悚。澄觀止目矚。械珠過笠澤。暉錦送漣垠。險韻差肩陸。奇思直尾鈞。憑增武林事。久久歲踰椿。右一首見靈隱寺志。

復園池上紅板橋新成同人分得文韻

朱欄卍字漾波紋。刻木爲橋也策勳。秋柳略如春柳映。一池今作兩池分。東來野色添紅影。西望詩情上夕曛。莫道小舟行不得。醉眠閒坐總輸君。右一首見復園紅板橋詩。

樊榭山房集外詞題辭

余束髮喜學爲詞。同時有洪稗村、沈柳亭輩。嘗爲倡和。彼皆尙花庵草堂餘習。往往所論不合。未幾。各爲他事牽去。出處靡定。不能專工於一。今二君已化爲宿草。余猶視息人世。閒作倚聲之歌。幾無一人可語者。去臘。於友人華秋岳所。讀樊榭高陽臺一闕。生香異色。無半點煙火氣。心嚮往之。新年過訪。披襟暢談。語語沁入心脾。遂相訂爲倡和之作。共得題若干。并注以調名。乃不數日。兩家已各成其半。會余適有白門之役。孟夏解纜。羈留吳苑者二旬。又足成之。頃寓秦淮。樊榭書至。知前後俱削稿。復合以平時所作。付之梓人。先以首卷刻成者寄示。迴環讀之。如入空山。如聞流泉。真沐浴於白石梅溪而出之者。噫。舍紫山而外。知此者亦鮮矣。獨余沈酣斯道。幾五十年。未能洗淨繁蕪。尙存故我。以視樊榭壯年一往奔詣。寧不有愧乎。時康熙六十一年壬寅白露前一日。同里紫山徐逢吉題。

詞調六百六十體。凡千一百八十有奇。一調有一調之章程。一體有一體之變化。作法既殊。音響亦異。殆難於詩遠矣。余友徐紫山。嘗教余作詞。謝不能也。厲君太鴻。於詩古文之外。刻意爲長短句。拈題選調。與紫山相倡和。大約懷古咏物之作爲多數。月之閒。動成卷帙。聲諧律叶。骨秀神閒。當于豪蘇膩柳之閒。別置一席。至於琢句之雋。選字之新。直與梅溪草窗爭雄長矣。余學詩垂四十年。尙不能工。太鴻工詩。古

文而琴雅一刻各極其妙人之智愚何相去之夔絕也石倉吳允嘉

詞於詩同源而殊體風騷五七字之外另有此境而精微詣極惟南渡德祐景炎閒斯爲特絕吾杭若姜白石張玉田周草窗史梅溪仇山村諸君所作皆是也自是以還正不乏人而審音之善二百餘年以來幾成輟響近稱西泠詞派或踪跡花閒或問津草堂星繁綺合可爲極盛迺緣情體物終惜其體製之未工獨吾友樊榭先生起而遙應之清真雅正超然神解如金石之有聲而玉之聲清越如草木之有花而蘭之味芬芳登培樓以攬崇山涉潢汙以觀大澤致使白石諸君如透水月華波搖不散吳越閒多詞宗吾以爲叔田之後無飲酒矣樊榭天才軼舉靡不洽習而志尙高遠泊于榮祿其與子同寓廣陵時當日斜花外必相約爲倚聲往往子未及脫稿而樊榭點筆已就子輒爲之罷去此卷中懷古咏物諸篇皆與同里徐丈紫山酬唱者爲多予旣滯淫旅人生意消削從塵土挈屑中手把是編恍鉛槧之周旋感素琴於秋思傍徨弔影殆若異身有不禁爲之掩卷憮然也康熙壬寅立秋日玉几生陳撰書于真州之玉淵堂寓館

余友太鴻秋林琴雅之詞質也靈虛學也膏腴才也飲飛如玉光之陸離劍花之參差如是而命之爲詞苟舍是其將焉如雖然猶有說夫詞南唐爲最豔至宋而華實異趣大抵皆格于倚聲有疊有拍有換不失銖黍非不咀宮嚙商而才氣終爲法縛臨安以降詞不必盡歌明庭淨几陶詠性靈其或指稱時事博

徵典故。不竭其才不止。且其閒名輩斐出。歛其精神。鏤心雕肝。切切講求於字句之間。其思冷然。其色熒然。其音錚然。其態亭亭然。至是而極其工。亦極其變。苟舍是。無或取焉。今太鴻之詞。不必樞其貌。蠟其言。抽其關鍵。拔其轅轅。上下五百年。居然獨樹一標壇矣。余弱年從羨門侍郎。竹垞翰林論詞。嘗取宋末諸家爲矩矱。久竟棄去。近與太鴻還往。回理前緒。不禁嘖然一笑。思效邯鄲之步也。康熙壬寅清和月。鷺籠生吳焯書。

歐陽圭齋謂雅卽雅烏之雅。以其聲能動物也。詞之聲生于宮羽。而動物者必雅。余與樊榭交。垂十五年。見其偃蹇佻僚。不廢文史。而感時覽物。託寓微至。詩所不盡。必形之于詞。上者海山縹緲之音。次亦不減游春綠水之奏。聞者意消神往。直與鄉先輩清真玉田山村句曲諸公。相後先矣。符曾幼魯題。淡而彌永。清而不膚。渲染而多姿。琚刻而不病格。節奏精微。輒多絃外之響。是謂以無累之神。合有道之器者。詎止有井水飲處。必歌柳七詞令。市伶按拍稱好乎。意林趙信。

是集名秋林琴雅。計一百六十闋。先生三十以前之作也。越十九年。手編樊榭山房集。錄五十六闋。有閒易字句之處。餘一百四闋。不復存錄。而後進得殘篇賸句。往往等諸吉光片羽。矧全帙乎。爰以集外詞附于後。光緒十年甲申孟冬。同里後學汪曾唯。

樊榭山房集外詞卷一

秋林琴雅原四十七闋編入
正集二十四闋

眞珠簾

雨夜汪青渠齋中看芍藥

疎寮自占藏眞島。棟風遲。不覺花深寒悄。背檻試懸燈。護幾枝嬌小。板觸鬢絲禪榻外。是蠶栗。梢頭初好。相惱。又香潤人衣。雨聲吹到。深意不爲留春。爲飲盟吟社。不教虛了。舊種記銅駝。料此情多少。歸幘拖霞休贈別。便一任。綠房迎曉。買笑。怕破霽簾痕。添些蜂鬧。

天香

浴佛

櫻溼猩紅。筍垂鴨綠。今朝四月初八。調御生時。淨居降處。乍試銀盆珠沫。梅檀沈水。正小喚。廚娘煎歇。灌頂身雲吹散。盤盤洗出螺髮。年時暗盟重撥。拜花龕。長生私乞。心字濃燒屏底。更衣香辣。又是者番情緒。愛淡裏。輕梳碧山抹。寫幅金經。小名自跋。

臺城路

樊榭山房集 外詞卷一

蠶

晶鹽水浴齊生日。新排曲房深護。纔細鬢梢。忽圓指節。箔上低昂分貯。一春心苦。也不爲漂花。怕他風雨。到得紅時。柔桑顰眼已空樹。雪絲漫縷千縷。試小留蛹母。配勻蛾父。溼黛初描。閒愁易結。滿紙彎環眉聚。吳中忌處。早繭獻雙功。野祠簫鼓。贏得秦郎。碧窗聽軟語。蠶二十七日而老。謂之紅蠶。出埤雅。蛹母蛾父。出荀子。秦淮海集。婦善蠶事。故作蠶書。

玉闌干

金沙灘荷花

流金橋下清冷水。記得小船曾樣。浦風有意。扇紅妝。先催放兩三冷葉。露翻荷背明珠墜。算粉裙飄揚似此。去年花裏。去年人。空無言。竚立沙嘴。

滿江紅

鄭義門自號五嶽遊人。索予題其紀遊畫冊

英氣如君。駕千丈。蕭森翠寒。尋常肯。塵中溷迹。負卻躋攀。屈子遠遊奇服在。尙平婚嫁此身閒。記殘冬。向我話仙蹤。無數山。青岱去。玄嶽還。登二室。俯轅轅。看玉蓮幾瓣。擧下孱顏。太白風雲生腳底。清涼冰雪現眉端。詫明年。又擬訪朱陵。招紫鸞。

又

錢塘觀潮追和曹侍郎韻

何處神鼇忽翻動。千尋銀闕乍龜赭。中間怒吼一痕如髮。倒捲青天吹海立。橫驅白雨連山發。被此聲。日夜洗句吳。淘於越。奇險勝瞿塘雪。傾城看中秋月。壓秦皇強魄。至今驚絕。隔岸迴波搖未定。西興漁笛。悠揚歇。想錢塘。破陣萬靈歸。紛幢節。

一萼紅

雁來紅

夕陽中正。蕭蕭颯颯。一陣打窗風。黃木犀殘。碧牽牛斂。天意妝點秋容。漸商略。丹砂換骨。扶碧篠。渾學醉顏濃。怪石苔嵌。疎汀水減。掩映蒙茸。遙夜初鴻飛度。寄江南芳信。月底相逢。是葉非花。將花做葉。今後輕薄霜楓。爲最憐。心情難老。步微陰。閒翫藥闌東。寄語相思人道。莫誤題紅。

月華清

元夕同金小郟賦鞦韆燈

水影吹香。花光蕩月。燭叢光影如許。何處留仙。便擘皺裙留住。栽畫架。合傍星橋。曳綵索。還依燈樹。飄舉似輕身。燕燕賺他遊女。誰信巧如丁緩。早貼就眉鈿。翦成腰杵。送過牆頭。疑是夜珠來誤。憶舊日。嬉戲波心。占盡了。金明池路。歸去。有紅船次第。更闌簫鼓。

摸魚子

宛陵梅文常爲予寫西溪卜居圖。因題其上。兼懷尊人耦長先生。

問誰移亂泉一曲。藤橋宛轉。河渚青羅。鬢看皆好。羃歷斜遮疎樹。橫斷渡。指牒子。如鳧小槳。輕搖去。蘆花深處。笑蟹斲魚牀。何時料理。始有此家具。平生意。瀟灑愛山真趣。年年踏徧煙雨。百弓沙嘴閒田地。輸與眠鷗翹鷺。呼燭語。仗濃淡。香螺寫出無聲句。故人閒阻。更長憶梅翁。小溪春穀。獨速知蓑舞。

應天長

年年不到湔裙水。懊惱越梅猶病齒。智瓊姨。飛燕姊。勻掠鬆蟬知舊事。小長干。千萬里。枉說門前梧子。又是孟婆風起。熏香假翠被。

八聲甘州

京口

閱興亡多矣。此南徐。我今逐沙鷗。過建陵草色。練湖柳影。春事都休。好似秋容慘淡。吹笛夕陽樓。樓外茫茫水。著箇扁舟。綠鬢看山未老。縱凌雲意在。漂泊應羞。喚玉龍起舞。爲洗古今愁。最忘機。不如漁子。向晚來。和月一竿收。聊同宿。江烟江樹。也是風流。

買陂塘

荷錢

皺微波。紫屏風外。藕根絲脆初裊。田田點點黏天影。不覺千紅如掃。縈網藻。訝水蛙。翻衣只認鯨文小。碧圓多少。問覓藕何時。見蓮幾日。難買越溪笑。風亭畔。曾約玉纖親拗。未堪低障斜照。鵝兒欲啜清光破。偷眼依稀同調。空懊惱。誤釣線。穿來枉費江姝巧。疎簾興好。待鈿扇高擎。象筩半捲。臥聽雨聲鬧。鯨文古錢名

探芳信

廣陵雨夜。同故人徐紹武。汪抱樸。集飲于許渭符獵微堂。以藏花爲令。各大醉。明日抱樸將歸武林矣。

冷雲墮。苦燭暗梅霏。堦喧蘚破。約舊愁。今雨安排醉鄉可。風花身世渾無定。拚向花裯臥。儘淋漓。帽落青枝。瓊搖紅朵。珍重此閒坐。要句泊心旌。琴開眉銷。還剩杭州衣。上酒痕。澆只憐曉漲金蕉外。弱構飄然過。照相思。一點蘆中夜火。

祝英臺近

黃薔薇

軟屏流香霧重。春已欲歸去。短刺鉤春。更翦柘羅舞。幾回惹卻斜陽。蒙將初月。但吹送。麝塵侵戶。水邊路。柳花裙。資柔條。相看色如許。點染齊紈。添了小鶯語。故人昨有新詞。殷勤盟手。曉傾下金盤仙露。

清平樂

陳楞山松泉試茗圖

空煙吹翠。峰腋雲生細。消得清涼剛斛二。句破松根殘睡。幾年淮左羈愁。何時嘯侶林邱。記取雪殘歸棹。期君第二泉頭。

臺城路

懷下若舊遊寄金壽田

船窗涼燭分攜後。夢遊未忘清遠。柳髮垂溪。山螺過雨。陳帝宅邊曾見。吟情恨淺。但共坐深宵。忍辜茶盃。誰料今年。又憐梗跡在隋苑。蘋洲那時初返。笑風流不減。綠陰春晚。月墜江空。雲籠岫小。無復焚香書練。憑高望斷。恨如此幽尋。頓成星散。待續前期。葦閒誰是伴。

惜紅衣

賦團扇上蓮草美人

月裏盈盈。風前轉轉。嫩涼吹送。細熨桃鬢。羅衣淨無縫。東牆未見。容易得情田先種。飛動輕削楚腰。比桐花么鳳。天然壓衆。愁眼啼蘭。無言正如夢。纔離小草。半面漫邀寵。別有寸心通處。拾翠水邊曾共。恰恁時憔悴。湘簾畫屏深擁。

秋霽

金山寺

樹影中流走萬里江聲。地軸吹轉。香塔擎秋。翠蓬穿水。化人別開宮殿。古臺一半。倚空閱盡魚龍變。客思倦。長是潮生風熟。布帆遠。回首悵望。北固南徐。六朝銷沈。鈴語悽斷。問何如。還留玉帶。禪心孤月鎖。相伴清曉。碎霞飛近岸。郭公墳上。日日暗露沙痕。擣搖驚起。叫羣棲雁。

向湖邊

拜句曲外史墓

菌閣煙銷。簷樓塵鎖。片片冷雲疎木。人似秋蟬。渺餘音空谷。恍昔年。吹斷瑤笙。寥天回首。凍草此時纔宿。風翦蓉裳。恐難禁幽獨。歸去瀛壺。便覺吟朋俗。誰再倩好手。圖孤清冰玉。一任香狸竄。殘碑深竹。理哀絲漫鼓。懷仙曲。還如倚三尺細泉。看夜綠。遼羽重來。笑飛光何速。

如夢令

庭下丁香千結。毛文錫青鳥不來愁絕。唐昭宗無語倚屏風。李珣正是銷魂時節。毛熙震離別離別。韋應物惆悵嗟

鶯殘月。章莊

翻香令

題趙意田倚樓圖

斷雲依水晚來收

辛幼安

幾行征雁下汀州

趙旭

江之外吳淞山之麓

王特起

好江山何事此時遊

周密 醉

香空斷楚天秋

馮子振

故人多在玉溪頭

元好問

尊前月

沈會宗

聞遙笛

呂渭老

這風情都屬趙家樓

黃昇

探春慢

孤山訪梅

清淺湖波。回環孤嶼。落日空亭凝碧。凍鶴無聲。銜蜂罷鬧。忽有苔枝橫出。留取古時香。渾不是、古時春色。過牆料峭風來。吹花開了還側。何意相思今夕。看似淡如無。半闌疎白。睡起推蓬。酒醒聞角。消受高人吟癖。水月更交光。仙袂在、玉壺塵隔。禁住新寒。幾生纔此修得。

沁園春

塵

微步凌波。清歌繞梁。凝芳暗低。記羅窗未拂。簪花偷學。鈿箏初滿。藉草慵攜。依約爐邊。悠揚簾外。欲辟還宜。舊犀導風尖甚。上平臺望處。眼纈都迷。浣衣苦費柔荑。正願効輕微安足辭。笑軟紅碾玉。橘中戲賭。深黃篩麴。柳際斜垂。擣麝成香。逗煙生綠。硯匣封時。句懶題。銷魂也。覓去時蹤跡。休掃桃蹊。窗未拂。畫塵上學書。見南史。樂器塵滿。見隋書。沈約有醉塵。韓偓詩。紅簾不受塵。石季龍有芳塵。臺。鄭源婢。畫。浣衣云。耶。君塵土太多。令人手皮俱脫。駱賓王咏塵詩。願言心未翳。終冀効輕微。橘中叟。賭玉塵。三百斛。

生麴塵深。柳宗元詩。溫庭筠詩。擣麴成塵。香不滅。李賀詩。薇帳逗煙。

樊榭山房集外詞卷二

秋林琴雅 原三十七闕編
入正集八闕

驀山溪

鄭菊山翁諱起。卽所南之父。有水南半隱。在清波門外長橋。

湖南深曲。元是漁樵社。欹壑架長橋。綠陰中。幾椽秀野。今來悵悵。不見岸烏巾。衣砧沒。釣船空。收豎收羊馬。風蘭幾葉。應看佳兒寫。古月墜空山。似飛來。冬青樹罅。無多半隱。幽意自乾坤。休憑弔。半閒堂。螢火明秋夜。

祝英臺近

蛙

鴨頭搓。裙腰染。鼓吹鬧南浦。叫暖暄晴。似把好春訴。添他一兩三聲。荒塍斷港。爲幾陣。清明時雨。苦無主。最苦別館華林。跳梁小池聚。到了燈昏。掩重門深戶。漫勞閒聒空塘。忙催春老。又黃卻。菜花無數。

高陽臺

湖上感舊

樊榭山房集 外詞卷二

野水垂楊古牆蒼。傷心清淚偷沾。前夢無憑。閒情曾過鶯簾。狂紅只在西湖路。記來時。月細風尖。最情
忒。同問青旗。同譜烏鹽。酒人轉眼多星散。任塵埋蠟屐。網裏書籤。能話相思。憎他雙燕呢喃。平生不信
潘郎鬢。到而今。鬢也絲添。更厭厭。葉暗空庭。雲墮晴簷。

天香

龍涎香

苦竹潭深。枯桑島遠。靈姝秋臥無味。袞霧醒初。戰沙去後。剩得唾痕凝紫。魚衣試探。重與和宮。匳花水。天
上梅魂乍返。溫麝似垂纖尾。并刀斷雲暗遞。認分明。蜃窗燈穗。一縷閒情如舊。煖金難寄。焚出青蘆雨
裏。伴小舫。涼聲靜敲碎。松石圖開。餘煙半紙。霏雪錄。尤溪縣西苦竹潭。中多龍涎。梁四公記。洞庭山南龍
焚龍涎香。柯敬仲詩云。夜雨推篷寫
松石。焚香何處獨題詩。蓋紀實也。

摸魚兒

蓴

過清明。第三橋畔。香鈿半漾平碧。纖痕雉尾浮青紫。漫把露葵呼得。忒小摘。有盪槳。人人羨玉嬌風色。葉
圓似拭。正觸撥柔情。千絲萬縷。到手不堪織。前期遠。曾共飄零詞客。酒蘭羹送冰液。沈郎自許能知味。
千里還伊吳食。秋思寂。但望斷。鷗鄉煙外愁何極。幾時肯憶。笑鱸斫蓬池。不如水際。采采趁今夕。

齊天樂

蟬

青林響接炎光永。垂綫不沾塵土。刻鋼仙形。貯風清腹。笑倒世閒兒女。疎枝過雨。又咽斷殘聲。暗移深樹。
 涼碧勾雲。高情那信雀相妒。曉園莎露乍滴。問何人咏得。一翦輕羽。趁夜潛飛。臨妝欲動。好助綠窗眉
 嫵。長嘶正苦。憶舊日瑤宮。孟家曾顧。淺畫生衣。冷颼吹不去。元祐孟后衣畫雙蟬。目為孟家蟬見可談。

又

前題

一番枝背旁鳴起。池塘頓添清絕。竹翠捎空。梧陰避景。占了嫩涼時節。偏驚遠別。是催落殘陽。又催殘月。
 獨韻么絃。更無人為表孤潔。桃笙夢回靜聽。每星河夜淺。餐露聲歇。耀火休驚。柔竿漫試。吟到秋來悽
 切。西風再熱。候緩蛻冠花。舊愁重說。剩有癡情。繞塔尋翳葉。荀子。權蟬者。務在明其火。曹植蟬賦。怪柔竿之冉冉兮。還微黏而我纏。

水龍吟

白蓮

綠羅萬笠高低。姑山雪擁橫塘路。鉛紅浣褪。娟然幽意。最宜涼雨。葦亂萍疎。銀囊獨立。羽衣來暮。襯鱗
 波底。魚雲粉朵。如明鏡。添妝處。多少輕舟。溪女歎年時。嫩瓊誰主。雛雛開徧。滿陂照影。舊遊懽阻。香遠

堂空舞綃零落含悽無語念玉笙纖手與花一色
馮殘清露高熙九年中秋賞月香遠堂池中植千葉白蓮上皇召小劉妃獨吹白玉笙霓裳中序見

武林舊事

桂枝香

蟹

江楓落早正執穗侵星
塍畔爭擾不住腥泥郭索
臍翻紅蓼疎簾半映圓沙細
聽燈邊雪聲鳴曉漫愁翦
網骨清沫白葑湖秋好
憶月底糖霜乍擣會吟侶
筠窗擊時寒小翠菊分香
洗手盡消樽醪何年化石
波飄出溢金膏故國天杪
枯梢無數依稀粉本尚留纖爪
咸淳臨安志西湖葑田產蟹謂之湖蟹本草蟹入洞穴年深成石蟹畫家有蟹爪樹

瑤花

東風薄劣墜粉吹香又去年
情緒高城亞字煙淡抹
尋到笑桃門戶扇羅風小
憎半掩銷凝眉語料生來
千媚中央解唱瀟瀟微雨
促人纔解頽陽悵一片吳波
堪斷腸處黃鸝巷口可憶否
舊日崔紅曾住綺
疏天遠便不管雲昏月苦
縱他時重問芳遊迷卻綠陰歸去

燕山亭

唐開成陀羅尼石幢在龍興寺
幢爲處士胡季良書埋地中已久下有舍利五十四粒崇禎
丙子忽放光掘得之都穆趙頤諸人所未見者也同徐丈紫山賦此解俟好古者采焉

劫化荒燐。風鬻怒濤。香界尋常都捲。科斗字殘。蜥蜴碑沈。故物武林稀見。怪石能言。夜光迸。天陰深院。奇幻比雪後峨眉。佛燈吹徧。追數甘露初過。又唱出翹翹。上林花亂。剛紀二年。忽涌青幢。銀鈎刻來四面。讀罷蒼涼。無片語。可銷征戰。堪歎。聊拓取。學伊懸腕。

花心動

玫瑰花

無力縈煙。馬塍邊。晴飄夾衣時候。疑是紫雲。濃笑妝臺。幻出綠叢微瘦。粉心黃顫。鮫紗膩。愛香韻。年年依舊。爲花惱。芬氤一縷。破禪銷酒。巷陌侵晨賣否。常映竹斜門。幾聲初逗。髻壓褪紅。鏡點殘蕤。休傍辟塵。斂溜泥金。曾拂宮人帶。歎今日。佩珠何有。翠陰裏。徘徊撚枝在手。

梅子黃時雨

蠶豆

誰種南山。又蛾麥弄涼。鳩甚分醉。記似雪花開。斷畦連綴。家近羅敷牆畔煮。清香暗透。茅簷底。三眠起。小樣翠籠。添了蔬美。應是。幽風詩意。便新茶繡釘。柔莢猶細。待和飯調酥。棟花盈地。殺菽霜飛。燕塞遠。苦相思。有江鄉味。青堆市。幾人買。絲溪尾。

滿宮花

細雨

看成煙吹做水。低盡春陰垂地。霏霏拂拂又濛濛。不是養花天氣。溼透子規聲裏。人倚疎簾無味。晚來幾滴枕邊聞。如在空江船尾。

買陂塘

書帶草

倚閒窗。纔題倒薤。塔前柔綠栽徧。離騷自古多香草。愛爾紛披纖軟。還摘看。似當日。泥中人把并刀翦。移根偏遠。總謝客池邊。鄭公鄉裏。一樣露痕淺。東風護野火。何曾燒斷。年年生意流轉。上蘭不入羣芳夢。且學青絲低綰。箋注倦。笑兒女尋常也識詩名賤。茸茸何限。對遠志猶存。忘憂早樹。留取映書卷。

又

仙姥墩在清波門外聚景園相近

水中央。一亭浮遠。風楊遮斷城角。餘杭阿姥當壚住。景物眼前如昨。思小酌。只釀法。無傳空負方平約。玉蓮杯弱。更喚取花姑。調成花液。當了萬年藥。人閒窄。除睡醉鄉堪託。沈腰何事愁削。仙山樓閣多塵劫。況此綠陰門鑰。休冷落。自遊戲。壺天謾使癡兒覺。春衫香薄。攜蜜炬三條。蘭醪一斗。同唱夜飛鵲。

滿江紅

題桃花扇傳奇

千古南朝剩滿眼。鍾山廢綠。問誰記。渡江五馬。玉樓金屋。復社尙興風影禍。教坊偏占煙花福。笑無愁。帝了。莫愁湖。懽娛速。醉舞散。灰緋燭。宮騎走。降旛蠹。看湘東。已了。枯碁殘局。桃葉渡邊飛燕語。桃花扇底銅仙哭。算付將。此曲雪兒歌。難終曲。

探春慢

宋宮洗鉛池。在梳妝臺側。今爲僧院。

鳳去山枯。鵲啼月墮。東風吹瘦波影。脈脈流香。亭亭浸玉。空對琉璃明淨。花片魚銜得。縱還有。脂痕誰省。幾時鎖卻妝臺。回頭鄉夢無定。白雁來時秋勁。早淚滿碧紗。塵暗清鏡。楊妹詩妍。劉妃笙脆。往事十分淒冷。未浣深沈怨。謾汲取。頻煎茶鼎。換了空門。孤燈春雨鳴磬。

霜葉飛

九日葛嶺用夢窗詞韻

最愁秋壑堂前徑。秋蛩秋草。秋樹雁雲無力。護微霜。捲盡平湖雨。愛此會。清觴泛羽。君看殘菊。皆千古。歎舞燕歌鶯。但博得。銅駝恨事。枉費毫素。同是鄭客迷蕉。風埃牢落。醉中休倚能賦。欲從句漏訪丹砂。挹袂聽仙語。凭小閣。香生幾縷。飄飄容我吹笙去。謾再尋。西峰頂。喚起金蟾。海天空處。

瑞鶴仙

咏菊爲楞山生日效蔣竹山體

林臯寒近也。看麤眼。籬根菊錢圓也。鱗鱗雁雲也。又霜花淒緊。放秋歸也。冰泉引也。望南山。煙嵐淺也。自義熙開後。重陽甲子。幾番題也。遊也。傾壺細泛。冒雨幽尋。足清娛也。天隨子也。和紅杞采將也。笑桃鬢。杏靨爭春。烘日不似潭花壽也。祇金衣。黃鶻多情。舞裳伴也。

江月晃重山

月夜渡錢塘

江上已收白露。月中微辨青山。江如羅帶月如環。乘風去。江月在檣竿。記得瓜洲問渡。舊遊光景重看。客心鷗夢兩般閒。涼煙外。一抹固陵關。

高陽臺

蓬萊閣望海

雲斷山痕。天黏水影。望中何處蓬萊。奇絕殘秋。茫然對此浮杯。祖龍可是慳仙骨。甚西風。不送船回。最堪哀。老卻扶桑。忘卻誰裁。而今社鼓斜陽裏。已湖虧舊鏡。梁換新梅。一朵青紅。虛空那有樓臺。琴心賦筆。看俱懶。洗嶂泓襟。抱全開。白無涯。月又初生。潮又初來。

蘇武慢

謝疊山先生贈家半村先生詩真蹟卷子。半村先生諱元吉，字无咎，宋咸淳七年進士，仕爲烏程縣尉，遷著作佐郎，入元徵聘不就，隱居以終。此卷今藏姚江族人處。

朱鳥歌殘，白翎詞起，天地一家春別。霜凋玉樹，風折瓊花，只有野梅高潔。曾憶故人，拂袖歸來，暗蓄清血。又燕臺塵杳，曹碑魂斷，夢尋薇蕨。江上路，冷菊空籬，疎燈破屋，長記義熙時節。琅琅夜誦，滿紙驪珠，驚說半天虹月。應是怕伊，鬼泣龍愁，巧偷豪奪，放扁舟。西去從此，相思晉雪。

臺城路

上虞百官江口舜廟

重華不見蒼梧遠，西風忽吹人世。苦竹荒濱，冷葵智井，那有窮蟬苗裔。翠峯相倚，恍二女明妝，含顰長是。日暮神歸，村簫聲歇陣鴉起。江東客心悽絕，渺餘情飄入，湘月湘水。鳳瑄雲迷，龍裳雨壞，後五百年何事。欲行且止，漫拂拭殘碑，古香難洗。紅染楓天，灑空千載淚。

滿江紅

曹娥廟

簾捲冰綃，開面面，軒窗貝宮。有越上采蓮兒女，來覓遺蹤。飛楫浮江，仍競渡，畫衣拖水似凌風。佩明珠，若

箇許同遊。孫媚容。花舊在紅處。紅紛屢舞。列歌鐘。忽霏微靈雨。遠過千峯。收釣客歸山色裏。讀碑人立暮煙中。望青林一帶隔潮痕。都是松。唐錢塘孫戩八月迎濤船覆死戩女媚容巡江哭以瓜設祭投江抱父屍出事見文苑英華

蘭陵王

三高祠

冷煙闊。笠澤茫茫。釀雪垂虹畔。搖蕩素波。鷺入蘆花。雨明滅。枯沙抱斷玦。清絕。罨船唱歇。殷勤問。如此水鄉。定有飛仙弄華月。黃金鑄重活。自一舸飄颺。忘了吳越。秋風又到愁時節。拋洛下秦地。貴遊無夢。蕙香茶熟。味最潔。笑名是何物。騷屑漫晞髮。厭格鬪蝸巢。相响魚沫。青山今古銷豪傑。愛釣雪亭外。釣絲風刷。翱翔無所。洗眼望翠佩夏。

江城梅花引

扁舟如葉過紅橋。雨蕭蕭。雪蕭蕭。樓外闌干闌下。廣陵潮。一夜官梅開欲綻。野梅發。送將行。伴寂寥。寂寥寥。寥碧雲高。飲未豪。吟未調。寄也寄也。寄不便。南雁程遙。憑仗空香吹入玉人簫。彈與北枝花。上淚千點點。有東風。不肯消。

釣船笛

韓侯釣臺下作

清角起淮城。寒緊拍天風浪。底事不留英傑。笑乃公將將。枯荷野鴨小洲前。卻愛釣絲漾。何似客船吹笛。過南昌亭上。

淡黃柳

賦曉色

河斜月淡。啞嚀鄰雞急。遠夢初回窗影白。纔辨鞭絲帽帶。催起勞勞早行客。度阡陌。煙中樹如織。何人破新霜跡。料梳棲倦眼開難得。一路惺忪。半村微亮。腸斷玲瓏唱出。

樊榭山房集外詞卷三

秋林琴雅原三十五闋編入正集十一闋

倦尋芳

揚州與江佩水別三年矣。辛丑春日。在都下。重見于程荅棧齋中。話舊悽然。因製此曲。

水萍不定。煙月無端。人海逢又。曲曲蕩灣。空老那回楊柳。十二街中。燈過五十三樓。上寒銷九。數年華。但簫沈夢遠。鏡窺吟瘦。共細乳分茶。清晝門外塵縈。儂定能否。淺碧西山。贏得此懷如舊。相見猶憐雲聚散。相思應在花前後。似分明。話秋池。雨窗時候。

花發沁園春

瓊花觀春宵小飲

柳裊新裁。杏開初嫁。竹西自古隋苑。因風側帽。借月窺簾。九里繡街行半。青旗影轉。攜酒訪深沈。瑤殿正。扇暈寒拂飛鸞。釵光明動。棲燕可。惜司花不見。繞無雙亭前。細訴清怨。香燠玉悴。雨絕星移。十二畫闌天遠。傷心未慣。聊一醉。問春深淺。念草草約伴。籠燈吳船江上歸晚。

駱龍謠

虎丘

鬢影春船。鈴風午樹。一徑松門苔繡。北去南歸。殢幾番歌酒。聽歌侶。畫壁無蹤。覓酒伴。卷波非舊。祇年年。小泊情懷。渾相識。半塘柳。吟邊石。望中樓。罨歷亂墜絮。拋殘芳晝。客心孤迥。更闌干垂手。過清明。尙未還家。問燕子。定巢能否。者些時。吳水吳山。盡成迤逗。

百字令

表忠觀懷古

雲旗風馬。見虯姿。髣髴英雄徒步。啼得羅平妖鳥盡。自向錢塘開府。玉冊樓高。錦衣城壯。百萬貔貅駐。江神心折。迴濤先避強弩。休說朱五經兒。東南霸氣。三世偏能據。天遣山河都姓趙。拱手還歸真主。麥飯空祠。柳圈寒食。緩緩歌遊女。蘇碑仍在。眼前龍鳳飛舞。

霜天曉角

華秋岳松月圖

查牙老樹。記得何年遇。攢出翠鍼千百。是妙手新栽處。過雨涼。月吐紛紛清影。舞孤鶴。不成秋睡。又翻下半空露。

南樓令

醉仙圖

無夢到槐柯。蓬山自踏歌。酒浚巡。頃刻花多。有酒有花吾事辦。呼冷月。出滄波。落珮任顏酡。壺中一太和。儘長年。銷得婆娑。便道老仙真箇醉。人世醒。待如何。

玲瓏四犯

南屏和徐紫山韻

九疊匡廬。恰宛在湖南。松雨新染。畫出青紅。斜照玉匳開展。隨意捨卻划船。指竹尾。數峰遊徧。聽下方。鼓笛聲來。穿塔冷雲遮斷。暮鐘初起。僧歸遠。碧玲瓏。有人句管。重尋涑水崖碑在。零落釵痕蒼蘚。還問劍氣長埋。一例魚燈吹散。唱夜涼山鬼。紛萬古。騷情亂。

八寶妝

孔雀

影孕初成。花屏未落。只傍瘴煙腥雨。萬里攜來。闌檻裏。文采愁他相誤。金盆新水一泓。地錦安排。濃春時。雲婆娑舞。誰惜明妝圓翠。矜誇兒女。暗憶篋竹叢深。鷓鴣啼殺。舊棲知在何處。怎肯供。榕陰珥戶。且聊向。藤篴閒住。待升卻。聯拳左距。莫迷秦客。攀芳路。正貝葉香清。佛鋪有日。歸依否。鹽鐵論南方以孔雀珥

荔枝結實。孔雀在其下。召衆史圖之。各極其思。華采爛然。但孔雀欲升藤篴。先舉右腳。上曰未也。孔雀升高必先舉左。

埽花遊

白石蓮花燈

曲寮夜迴。正裊鬢茶煙。一枝斜颭。玉餅數燄。勝驪山琢就。暖泉香汎。水月分清。葉葉釵頭乍斂。最淒黯。是霜苦校書。虹冷談劍。升降吹素豔。恍照破秋心。滿懷蕭澹。六時漏點。更東林夢去。岫深苔掩。絳蠟啼香。幾許風情自感。小憑檻。捧重臺。妙明無染。

金浮圖

元中峯禪師遺履在雲居寺

松門碧。千秋講席。不借猶存。素絢如昔。想高僧。定後工詩筆。養就新篔。自具參天標格。踏破山青雲白。雙趺解處。遊戲何人識。蛛網積。堂空磬寂。未墜眞風。笑他留隻。茫茫大塊同爲客。回首連昌。蘚暗文綦跡。幾緗軟紅可惜。攜看過午。葉響煙林側。高峯謂師是竿上林新篔

三部樂

流求紙

瀛海荒唐。訝未識蔡侯。素濤懸影。一簾花雪。輕揭煩他文頸。早傳徧。山北山南。坐鬪鏤樹底。石几鋪淨。碧環蟲女。可有譯書題贈。坑灰昔時乍冷。說先秦采藥。襞牋誰證。蠶帆又移近浦。星槎風定。展松紋。乍磨

翠餅須分寫。歡斯異境。身世似粟。蓮鬢外。天水遙永。歡斯。流求族姓也。

水調歌頭

訪吳丈志上寄老庵

撫景不自得。奈此綠陰何。試尋北郭隱處。亭角掛煙蘿。門裏簾櫳如鏡。門外帆檣如薺。靜躁隔無多。夫子一邱壑。舉世盡風波。枕琴眠。看雲坐。采芝歌。老來苒苒。奚事圖史日摩挲。與我周旋作我。不恨古人不見。鶴鬢任教皤。蟬亦愛清境。流響出庭柯。

澡蘭香

五月一日臯亭山下競渡

霞翻浦樹。雪濺汀蓮。疊鼓彩虬欲起。梭船貴買。鏡檻先開。盡逐鬧竿遊戲。定何年。鳧羽凌波。風光留人似此。打扮杭州。十里銷魂煙水。棹轉盤渦更險。爲憶山前。受降遺事。花釵翦艾。麝粉吹菰。越女但知沈醉。瞥回眸。衆裏盈盈。行雨防霑羅袂。念散後。夢繞湘雲。涼榭新睡。宋黃公紹競渡權歌。朝了霍山朝岳帝十分打扮是杭州。

買陂塘

題洞庭龍女圖。隳括湘夫人辭

白雲來。洞庭渚北。雙眸眇眇愁子。秋風乍嫺層波遠。木葉翻飛如雨。期又阻。獨騁望。蘋中不見巢青羽。相

思欲訴。悵。澧。有。紅。蘭。沉。生。碧。芷。公。子。杳。何。處。朝。馳。馬。忽。向。江。臯。羈。旅。佳。人。邂逅。低。語。未。能。騰。駕。借。煙。逝。築。室。水。心。如。許。蛟。瘦。舞。算。只。在。椒。堂。荷。屋。香。蘅。宇。襟。遺。南。浦。看。霓。帶。繽紛。九。嶷。迎。得。聊。以。共。容。與。

金縷曲

白燕和紫山韻

掠影分池面。訝今年。社前初到。練拋雙翦。珠館何時歸去後。不定翩翩風顫。還細認。謝家深院。卻怕芹泥輕澆得。舞爭高。月底依稀見。銜墜絮。舊巢伴。倚紅杏處。花微歎。恁休誇。烏衣輕俊。羣遊非慣。飛上銀旛相比竝。已別春溫爐炭。簾下誤。玉人低喚。莫是灞橋寒尚在。阻鈿車。寂寞音塵斷。看弱羽。帶流霰。

湘春夜月

當歌有感

翦春燈。越羅無奈寒侵。裊裊乍囀鶯吭。清絕月穿林。丁字竿垂簾下。恐落梅風起。吹散難尋。算世間只有。酸甜幾拍。堪訴情深。朱顏暗換。錦屏迢遞。千萬沈吟。搵透啼衫。知那裏。弄絲煙柳。猶繫人心。鱗乖雁阻。寫翠牋。誰是知音。恁怨咽。縱當時聽得。愁眉早聚。何況而今。

憶少年

朝雲湖上。春風門外。非煙牆畔。行來似無力。好花枝微顫。評泊圓姿應未見。憶長蛾。碧山俱遠。清宵夢

難到恨雙雙銀蒜。

戀繡衾

羅屏低隔塵繞街。冷香茸初卸小釵。見說道分攜近。悄無言愁黛費猜。雁燈花共珠啼墜。寫烏絲剛捲。又開始信有銷魂賦。最銷魂蘭槳未催。

玉樓春

銀塘冰泮晴波溜。照影獨來凝立久。一痕風帶不須寬。兩翦山螺依舊秀。釵梁蜂蝶勞纖手。底事暗驚朱粉瘦。欲絲未絮恰纔芽。漸逗新愁渾似柳。

清平樂

香塵不起鏡屨清於水。親試盤鴉簾影底。細雨蘭膏微膩。徘徊欲就雲縞。些些轉側橫波。聽得花冠唱也。料應塔日斜趁。庚信賦還抽鏡屨

賣花聲

豔韻徧芳蹊。幾字高低。宋牆東畔謝橋西。喚到將離春事減。腸斷紅闈。解語定淒迷。留綴鸞篋。香隨口角賤如泥。猶勝風欺并雨妒。分付鶯啼。

鳳凰臺上憶吹簫

盜簫

紫竹猶多白牙翻賤。別有哀玉清圓。盡奪得千峯翠色。寄與秦仙。一夜秋生指下。通宛轉。星孔勻鑄。瓊枝瘦脆。管似鵝。輕翳如蟬。誰知越窰古製。好吹出氤氳。五色飛煙。莫負卻青鸞素約。冷倚襟前。風外花甌共夏。修新譜。悠咽逾妍。空明境。依約赤壁回船。

水龍吟

題董羽出水戲珠龍圖。上有御前之印。并宣和御押。

千年紙上風雲。弄珠飛出宣和殿。滄波涌雪。銀鱗墨爪。騰空如練。閒卻綃宮。橘花開盡。有何人見。只象龍舊姓。毘陵啞子。吹腥雨。穿枯硯。回首天家頓遠。尙塵中。匆匆流轉。神湫易改。青燈素壁。鎖痕休斷。笛裏吟殘。梭邊眠熟。不勝清怨。望冰簾影外。香銷幾縷。海山秋晚。

賀新涼

秋日登八詠樓

衫袖秋情逼。倚闌干。一時收盡金華山色。多謝連朝西風緊。吹我萍蹤江國。又吹上層樓孤立。欲洗胸懷忙呼酒。但溪聲西去。鴻來北。雲渡水。天爲黑。參差城郭。今猶昔。念休文。一麾去後。聲名輝赫。宴罷樽前。惟家令。老妓依然相識。惹滿座傷心皆泣。大好東田歸應早。便詩傳八詠。眞何益。聊小住。聽漁笛。

樊榭山房集外詞卷四

秋林琴雅

原四十一闋編入正集十三闋

瑤臺聚八仙

題徐丈紫山黃雪山房在學士港口湖山幽勝處也。

湖影拖藍門巷冷。秋氣盡在茅檐。掉頭歸興隨分繡了霜罈。一夜幽蛩聲乍咽。小窗幾片葉聲添。正吟酣。瘦筇得意黃徧千巖。心空埽屏豔冶。便後身似住。雪北香南。渭水西風塵土亦復何堪。閒開琴趣自賞。祇相識孤鴻半捲簾。籬花候愛有名濁酒無用閒談。

水龍吟

雪中憶西溪

白天碎碎飛絲。打窗又是年時雪。火銷香燼。凍膠吟管。傷懷念別。前度衝風。江南江北。酒旗明滅。似寒鴉身世。驚棲不定。歸來後。落華髮。心事無人能說。憶西溪。此中清絕。壓蘆浦冷。吹花橋斷。玉山遙列。三兩煙舸。捕魚初罷。柴門如月。便長鑱荷了。自尋黃獨也。堪怡悅。

點絳脣

樊榭山房集

外詞卷四

燈夕同宋杏洲周少穆集吳尺鳧瓶花齋

柳院燈疎

史達祖

隴牒淡月雲來去李冠年華似羽

陳允平

無計相分付毛滂

萍梗孤蹤

晁補之

往事隨風雨

黃公度

君知否

晁冲之

煩君妙語

王沂孫

留我花閒住姜夔

渡江雲

題汪祓江紅藥橋邊吟客圖

蕪城當此際。峭風捲雨。黃柳尙蕭疎。玉句亭畔月。底事飛來。澹彩照西湖。襟情雪鍊。儘乾坤。清氣偏孤。同調處。花閒花外。麗句也堪圖。何如二分無賴。十里銷魂。記樊川前度。閒瘦損。燈邊繭栗。葉上盤盂。君歸爲問花安否。想豔紅。依舊紛敷。春夢闊。江南夜夜啼烏。

綺羅香

送紫山之秣陵和留別韻

象管題花。冰絃彈雪。難得詞場同氣。白髮相逢。眼底何論餘子。已闖破。竹屋藩籬。更採取。梅溪涯涘。喜從今。軟繡湖山。青旗風外踏歌起。無端堪此小別。凝竚浮雲墜絮。離蹤應似。舊院煙銷。去問秦淮春水。待肯寄。硯北香牋。還勝寫。江南眉史。夢隨君。片月斜明。鵲聲帆影裏。

六么令

春陰

雲留春住。濃與恨重疊。欲飛雨絲還嬾。水際天低帖。漠漠穿簾疑暝。燕子愁時節。誰家羅襪。翩翻無影。惟見沿堤草痕接。風姨空帶妒性。未解輕吹裂。閒壓幾曲疎闌。盡上眉心結。最不分明似夢。欲說終難說。樓東悽絕。芳期仍誤。錯認梨花是斜月。

摸魚子

簡吳尺鳧

乍歸來。參旗還轉。清幽繡谷無恙。羅垣拂翠低桐塢。時有鳴鳩相向。菟討廣。愛似爾。詞人心力拋非枉。輕煤佛帳。更換芋書多。彈蕉文好。點筆石闌上。當年事。複壁應堪惆悵。揚舲洗眼頻望。披襟不比燕臺雪。佳月新燈春釀。難競爽。寫雙調。吳蠶食葉毫尖響。澄湖熨浪。約曬笠秋晴。碧山如髻。漁笛譜漁唱。尺鳧近和予囊

城路味蠶
二首最工

臺城路

富景園。宋史所云東園也。舊在新門外。今草橋門內近城。卽其故址。空池喬木。閭巷蕭寂。予每經行。不知古情之頓深也。

生年落拓東城下。溪雲素心都負。跡似潛夫。身如灌圃。只記南朝衰柳。牆根井口。抱一片晴沙。眼波微溜。

縱不關愁露桃愁到不言後。探春那回行徧。冷餽猶未賣。人尙中酒藏謎花樓。戲嬰水館。別有憑闌紅袖。新煙信否。過幾度酸風。翠梢眉鬪。竚立誰知。暝鴉飛去久。

又

南湖感舊和蘭嵎韻

陰陰古水橫寒綠。誰家繞門煙樹。十載閒踪。三生昨地。銷得吹香詩句。眉彎老去。剩暈秀遙山。半低晴渚。盡日人稀。碧蜻蜒。罨蓼花住。傷離還有舊伴。周情兼柳思。檀拍無誤。岸缺連雲。闌空進月。絕憶單衾眠雨。幽悰未苦。更草暗王孫。待歸遲暮。欲覓風流。問鷗鷗不語。楊誠齋贊張功甫像云。約齋子方內歟。方外歟。風流歟。窮愁歟。老夫不知。君其問諸白鷗。

又

五月十八日東城閒居風雨騷屑忽動吟秋之思書寄吳石倉先輩

閒人不作閒居賦。新涼遽侵槐夏。徑暗雲生。池鳴雨到。誰共聯牀今夜。平林急灑。便招得秋風。扇情疎謝。十載江湖。起看窗畔釣筒掛。須聽田水瀾灑。插秧殊未晚。盈耳陶寫。屋捲重茅。籬觀朝槿。此意從無知者。殘書嬾把。料城外荷聲。小樓清野。夢遠重尋。白頭燈底話。

又

用儲華谷韻

銷魂橋畔青青樹。樹猶似此依戀。卻扇涼肌。垂釵秀髮。爭得微波心暖。花遊易斷。早吹散尊前。豔歌珠貫。說與鴛鴦。晚汀自結綠陰伴。重樓依舊十里。小屏留倩影。歸路猶短。七孔鍼邊。雙蓮節後。知否移燈書怨。行雲不管。悄隔了盧家。玳梁棲燕。好比江皋。弄珠帆漸遠。

又

懷大滌舊遊

白雲多處飛仙住。相思與雲爭繞。泥酒衣單。修琴歲換。零落來時瑤草。塵緣未了。見舞罷山香。墜花侵帽。瘦卻詩肩。翠匳看影自成笑。清遊無伴最好。亂峰開九鎖。曾許行到。石腳跳泉。松髻滴露。千古長懷坡老。何堪俗擾。待寄語芝童。洞天仍埽。一覽篝燈。浩歌星斗曉。

月下笛

送周少穆北遊兼懷是諫在上虞

草長鶯啼。江南節物。送君南浦。無情弱櫓。慣話聲聲離緒。抱蘭絃。空山共期。滿衣雨。雪生妙悟。向游塵撲馬。垂楊籠袂。此懷誰訴。杯行易盡。挽碧水東流。晚煙何許。勞歌散處。便是衰燈孤旅。太飄零。未垂鬢絲。壯心好在如意舞。雁書來。試問看碑有客先寄與。

摸魚子

咏窩絲糖追和陳迦陵韻

翦瓊霜。翠蓬深處。葱纖費盡料理。果匳已逐銅仙散。異味何人能嗜。忉利市。勝猜徧。晶猊玉乳雕闥底。春絲若此。想埽雪三千。揀花五百。甘冷未沾齒。冬郎去。塵滿金鑿密記。多情樂府。分裂等閒。粉繭消元夜。偷裹銀泥衫子。評泊似也不似。君謨遠。貢輕紅荔。燕姬解事。惜此並當時。鏡鸞撲碎。墮馬一窩細。

瑣窗寒

爲吳畊民賦因樹亭

老綠迷空。閒園已過。百年風雨。陰陰幾日。得意鳥聲喧處。儘無人。欵牀勘書。碧浮篆蚓。簾波午。話洗桐舊事。移橙佳境。問梅清句。前度鷗朋聚。笑對影忘言。覆棊非誤。江湖散盡。冷淡杯泉衣露。料中宵。桃根共攜。待將片月臨翠羽。領秋光。未要深山踏葉橋邊去。

白苧

偶閱瑤華集。載紫山此調。愛其婉麗。依韻和之。

引愁來。伴秋住。眉長眼細。愁無貯處。染得桃花似醉。倩雛鶯。趁閒喧破翠衾睡。應悔。月沈鉤。語未盡。匆匆分袂。離悰怕覺。歸展柔羅補淚。怪淚痕。近時都化。苔生砌。驚起。社前等燕。巧夕藏蛛。小顰輕笑。難道何曾省記。便證絮拈萍。與伊爲誓。而今異昔。漸檀霞褪靨。玉香銷臂。悄立閒庭。劃損瑤簪。春又相棄。甚日逢

迎不枉丹青寄。

南浦

玉几久客眞州。不得消息。歌以懷之。

分手隔年期。問而今。忍見清陰如幄。搖曳箇蟬鳴。懷人句。還似淒然同作。吞花臥酒。兩湖煙月都蕭索。應爲青山無計買。只把薄遊銷卻。長安飛雪深窗。與梅花主客。西溪曾約。歸到定秋陰。悲秋意。仍在小園籬落。今晨剝啄。翠篁風動。敲疎箔。何事因循。書不寄。知倚那家江閣。

百字令

六月望夜。宗陽宮老君臺玩月。括楊仲弘詩。

老君臺迴。夜涼多。如水臥看分明。穿出冰輪。松桂外。二更將轉三更。大地塵消。山河影小。風露上頭生。寒侵環珮。九天飛過無聲。誰喚絕唱楊郎。龍蛇竝起。金榜埽初成。笞鳳鞭鸞遊賞極。玉纖雙載吹笙。不信人閒。輸君才調。猶阻弱流程。醒心今夕。此身真到蓬瀛。

西子妝

同符幼魯趙谷林意田西池納涼

欹榭何峰。穿簷那樹。步過綠陰斜徑。天然十畝。瘦西湖。恍相思。采蓮人靜。闌干更迴。壓風鷺。絲飄不定。遠

香生頓夢辭冰簟涼歸衫影。攜幽興隔竹山童。小煮紅囊茗。一篇秋水趣無多。澹娟娟柳深沙淨疎蟬。曳暝看催展綃煙籠鏡。任螢飛自照回塘夜永。

露華

玉簪

峽雲夢遠。覓鬢底瑤肪。悄在秋苑。露采半欹。遮住青鸞輕扇。絕憐淡雅風姿。只隔幔紗遙見。涼颺度。嫣然笑拈。鬧埽初綰。銜來貼地腰軟。稱香浸銅瓶。幽素零亂。脆萼猶函黃粉。何事吹綻。幾日靜抱花愁。恩重碧潯芳宴。闌影外。琤琤雨敲又晚。

貂裘換酒

得子珍廬江書詞以代答并及繪友消息。

世事今無味。臥風前。晚涼岸幘。停雲思起。驢背黃塵歸先後。不道分攜似此。似社燕。秋鴻相避。巢姥湖邊。安吟笈。弔曹公。寂寞英雄地。歸不速。負春水。草衣我亦隨緣耳。愛東園。清蟬古木。說羲皇意。一卷傳來。天台句。移得泉聲在紙。定梓暑。明朝都洗。屋角斜陽明沙外。剩斯人。近又遊燕市。竹溪約。幾時是。

徵招

爲蔣丈雪樵賦

忘機石上行歌去。清寒自然堪耐。萬玉綴疎林。笑青山顏改。徑迷歸鳥外。怕埋卻。幽人羅帶。白斷溝中。溼侵焦尾。問誰能買。南北兩番風。仙家事。重看冷塵飛灑。酒熟倒葫蘆。有山童相待。梅花猶可載。指千古。煙梢春在。會心處。與伴披裘。已洗空銀海。

浣溪紗

獨背低花一欠伸。舊攜手處綠生塵。怪他鸚鵡語如人。未肯無情拋好月。長將多病伴濃春。樓中凝望鏡中顰。

踏沙行

湖上有感

屐齒沙痕。鬢絲煙影。十年迷卻探春徑。憑誰重唱竹枝歌。淒涼不是當時聽。敗舫紅凋。危闌香凝。湖風還我登臨興。梨雲柳霧捲俱空。而今纔放青山醒。

摸魚兒

七夕雨中集小山堂分得漸字

問天邊。妒津何許。今宵銀浦偏暗。巧棚兒女關情事。贏得英雄悽黯。渾是感。算雨雨風風。盡把心期賺。青樓夢澹。任不嫁娉婷。應須覓箇。蘿屋竹香掩。開襟話。洗出平池菡萏。詩思多在涼簾。秋光挽住憑杯酒。

莫放鬢霜來漸。雲半歛。傍幾葉。高梧漸瀝聽殘點。溼蟾未減。恐靈鵲明朝。訴伊辛苦。花水羽衣染。

阮郎歸

殘香漠漠雨垂垂。寒輕猶戀衣。無端箏柱似佳期。參差常暗移。慵曉起。怕春歸。咒教花放遲。桃花也有念人時。倚窗窺畫眉。

洞仙歌

秋陰

癡雲何事。做人閒秋窄。倦柳衰蘭更無色。想登山臨水。宋玉愁多。風吹去。遮盡湘天暮碧。孤村煙草外。一片淒迷。白鳥明邊倚樓立。情味近中年。最怕傷心都付與。數聲長笛。問那處天涯有斜陽。待雁寄書來。定知消息。

清平樂

宿符聖基秋聲館同幼魯作

酒香人定。冷落黃花徑。吟到江楓寒未勁。雨入鉞筓堪聽。自饒宋玉才情。何妨榜以秋聲。今夜秋聲重。做斷雲新雁程。

樊榭山房集外詞

河傳

題顧升山蔬果畫冊

青浮卯盃餅。煮槐芽。竹胎猶短。園丁掣鎖。疏籬煙滿。我來參玉版。一村嫩雨。林梢泣。如噉眼。鷓鴣和苔。剗。洋州詩句會東。有人炊晚飯。笱

三月小桃吹謝。綠到荒原。英雄種菜不堪論。蕪菁晝閉門。臥龍已去。天星隕。軍聲盡。戰士猶微墳。至今

遺種乞鄰翁。殘冬滿畦黃葉風。蘿蔔

顆顆黃破。一林盧橘。縣金欲墮。吸紅螺。愛新鷲。婀娜亂壓東園舸。跳脫瓊瓏美人腕。牽銀蒜。映得光零

亂蠟兒團。汁兒酸。搓丸欲將書寄難。枇杷

天涼似水。霜黃梧子。斜陽返照。秋香一樹。纍纍。蠶靡。鯉魚風又起。晶盤買向閒坊市。空齋裏。點綴烏皮

几。遠遠疏澹如無。清虛酒醒聞著渠。香櫟

低甯萸灣。亂覆蘭渚。蟹舍魚叉。斜撐艇子。照鬢鴉。家家采菱娃。江南水國堪消夏。涼風灑。粉刺兜羅帕。

生憎辜負鏡奩花。天涯浮梁去賣茶。水紅菱

貢兼橘柚南方無偶。鳥爪休捫倚闌閑弄。脈脈想見銷魂玉纖痕。碾香漬入搓酥粉。西風緊。一夜芙蓉冷。檀奴有意爲遮。交午腮紅。傍簾櫳。木瓜

村陌吹笛水風涼。綠螭牆邊路長。牛衣古柳紫瓜香。商量爲他加蜀薑。園官菜把無萵苣。清貧處。且汲

流泉煮折項瓠。白雕胡山廚多堪敵落蘇。茄

秋早懷抱龍涎味滑。雀頭名好。江鄉幽興最堪憐。年年蹲鴟不論錢。矮籬折腳煨殘火。山僧坐。往事今

無那。斫候鯖擣金橙。閑評何如玉糝羹。芋

湖天平碧鷓頭十五。雙搖輕楫。清歌學唱想夫憐。采得綠房和子擘。家鄉消夏灣前後。愁時候。心苦君

知否。館娃宮水煙空。秋風銷魂墜粉紅。蓮子

鶴巢兔柴濃陰瀟灑。樹間紅碎。滿江城堪愛。棟花風大。筠籠和葉賣。堆盤磊磊楊家果。玫瑰顆。招得檀

痕破。淚淋漓。溼臙脂。沾衣問郎知不知。楊梅

霜後紅透。榴房初剖。伴栗黃皺。和橙綠皺。石醋姊妹淒其。秋來子滿枝。粉裙曾染蠻腥血。華時節。光景

真飄瞥。向牆陰一樹。猶記舊風流。墜搔頭。石榴

溪漲風浪籠瓜船上。蜜筩虎掌。許多新樣。團麝揉酥醞釀。誰將雙鼻餉。散筵香粉祈河鼓。當風露。粘著

黃金縷。夢曹騰事難憑。東陵種時熟未曾。香瓜

閩嶺幽境。海天遙。綠荔丹蕉最饒。何如青子綴長條。風標紅鹽點不消。幔亭峯下家千里。沾牙齒。諫味無如此。試鐙天。擘柑筵。春纖裏。來和茗煎。橄欖

頰類堪摘。舊湖州。水驛旗亭小留。重來杜牧惱春愁。紅樓一時不奈秋。吳娘桃葉傷心曲。聲聲蹙歌罷。難教續。破時新。翠嫵鬢。嬌嗔中心別有人。桃子

風颭月暗。曲廊斜。別夢依依謝家。牽牛籬落挂青花。天邪。豆棚閒著他。豆花八月吹涼雨。秋深處。翦響裁吳紵。犀鎖帷。換袷衣。依稀一檐香又肥。扁豆右十五首見靈芬館詩話。

樊榭山房集外詞跋

樊榭先生幽居道古。翛然清遠。詩文之外。銳意于詞。嘗病倚聲家詭蕩者。失之靡。豪健者。失之肆。因約情斂體。深秀繚邈。興至思集。輒自比之孫氏一絃。柳家雙鑲。要以自寫胸抱。非求悅衆耳也。十年以來。已有三數曲。流傳朋游間。賞音者。以所見未多爲憾。予因請于先生。盡發篋衍之藏。釐爲四卷。鈔而行之。夫昔賢論詞。雅正爲宗。故清真堂名顧曲。草窗堂名志雅。惟志雅而後可言顧曲也。嗣是必有援琴受譜者。予仍得而讀之。快何如已。壬寅十一月三日。宛平龔燧履吉謹跋。

樊榭山房集外曲序

予攷尙書大傳。重華省方。羲伯和伯而下。各以八方之舞進。曰舞。則歌在其中矣。夫省方進樂。蓋以美盛德之形容。其義主乎頌。而八方各陳其土音。則其義又未嘗不兼乎風。斯六義之所以交資也。後世之樂。未足以語乎古。然讀漢志。則巴渝淮楚之音。俱領於奉常。而唐人盛稱魯山于薦于之歌。時勢雖殊。其義一也。元人始變而爲曲。要亦樂中流別之。以時而變者。今天子建中和之極。躬奉聖母。南巡至吾浙。東西老幼士女。歡聲夾道。吾友杭人厲君樊榭。吳君甌亭。各爲迎鑾新樂府。其詞典以則。其音增絃清越。以長二家材力。悉敵宮商鍾呂。互相叶應。非世俗之樂府所可語。大吏令樂部奏之。天子之前。侑晨羞焉。昔人以此擅長者。如元之酸甜諸老。明之康王。不過以其長鳴於草野之間。而二君之作。上徹九重之聽。山則南鎖助其高。水則曲江流其清。是之謂夏聲也矣。爰爲之弁其首。鄞全祖望。

樊榭山房集外曲序

邃古以來。生而神靈之君。莫如黃帝。恆以太乙與天目。在四維之歲。乘龍而四巡。彭祖前驅。松喬俠轂。入空桐禮廣成子。遊玄圃禮雲臺先生。謁峨眉見天皇真人。封東岱奉中華君之具茨事大隗。入金谷諮涓子。過楓山見紫府先生。所遇皆超絕塵埃之真人。後世迂闊之鯁儒。拘曲之愿士。覽真源抱朴之語。輒適然驚疑而不信。吾欲家到而戶喻之。而不勝辭費也。夫後世之所謂神仙不死之徒。亦不過於億兆庸人中。獨能離去葷濁。絕滅嗜慾。卽可以長生而久視。而以聖王視之。彼所謂方丈麗農之區。不能不囿吾域中。囿吾域中。猶吾食毛踐土之百姓也。皇帝撫萬靈。函九夏。水宿星飯。皇然不得寧居。出而省圓首之疾。若彼爲神仙者。猶復逍遙晏安。藏匿而不肯一見。斯亦女青之律之所不宥者也。西王母在極西之國。見於山海經爾雅。不爲無稽也。自黃帝後。而堯見之。而穆滿見之。而漢武見之。彼非所謂育養天地。洞陽之極尊者耶。而猶恆出而爲世主見。則凡許玉斧葛稚川者流。幸而長不死。尤欲得有道之君。而引伸其說。崇闡其教。惇惇然亟欲貢其所有。以顯靈異於人主。亦事理之所必至矣。今上皇帝紀號之十有六載。巡省方俗。臨幸浙土。洞天福地。吾浙什嘗占其三四。四明龍蒼台山。靈異勝迹。往往甲於天下。神仙窟宅。於此雲氣往來。豈無聞見。或化而爲嘉禾瑞穀。以答聖主之憂勤。或變而出喬雲醴泉。以示蒼昊之靈貺。

今上皇帝特厭棄文成五利之所爲。命珥筆執記之臣。削封禪之文。剗符瑞之志。曉然示天下後世。以六五帝四三王之大道。瓌珍異寶所在皆有。環溢心目。烏睹所謂使者四出。以求神仙耶。且吾固疑有仙骨者。苦無仙才。木公金母之辭。本王嘉所僞作。真誥所載雲林右英之詩。皆拙晦不可曉。降而至于呂嵒葛長庚。丹經道曲。義淺辭膚。無當於騷雅之選。道藏中文集之繁富者。莫如陶通明。杜廣成。然求其一篇一句之傳誦於人口者。而不可得。使其奏雲璈。吹玉琯。自撰歌曲。樊然雜進於文德誕敷。英略不世出之聖主之前。將恐其逡巡羞慙。而自媿其措辭之不工。則所謂飄飄有凌雲之氣。唯吾儒之健於文事者。能勝任而愉快矣。吾友樊榭甌亭兩先生。有挾天繪日之才藻。而恥蹈襲揚馬之常。故獯狝其辭。詭譎其體。借喬張之雅調。傳任僑之逸事。率先衢歌巷舞諸父老。迓六飛於天上。被之箎弦。次第進御。聖天子止輦而聽之。每奏一篇。稱賞不置。雖俳優乎。使枚臯東方朔若在。畢力而爲之。未能有加也。嗚呼。悽矣。愚者輒河漢其言。予爲揣物情。徵往典。從橫論列。以秕糠一世之塵濁。使知授符降斗之祥。不得專美於黃帝。而聖天子一遊一豫。彼神仙者。皆可折筮而使也。二君子所稱述。詞曲云乎哉。秦亭老民杭世駿。

樊榭山房集外曲題辭

錢唐金志章江聲

法部雲韶雅樂傳。清詞字字貫珠圓。粲花才子生花筆。合浦仙音各鬪妍。
笙鶴瑤天龔出塵。湖山春麗日華新。百靈擁衛羣真集。齊捧三漿壽一人。
詞源三峽湧波濤。刻羽移宮調最高。鳧藻一時歌燕喜。九重天上響雲璈。
樂府新聲妙抑揚。南推高史北喬王。鈞天試聽迎鑾曲。未許前人獨擅長。

仁和吳廷華東壁

譜得迎鑾法曲新。廣場二月播陽春。西方壽佛西王母。都作瞻雲就日人。
詞客毫端雅奏多。十平大樂協中和。廣颺他日金華殿。還進康衢擊壤歌。

□□蔣德秋涇

重見神人啓玉函。帝車南指五雲銜。誰翻絕調迎鑾曲。法鼓仙璈總不凡。
現來天女將花散。幻作羣仙駕鶴迎。不是一時雙綵筆。紫雲何處寫遺聲。

錢唐丁敬龍泓

孝治真堪邁百王。慈宮親奉九霞觴。新聲擬祝無疆壽。才子迎鑾各擅場。
羣仙爭集百靈趨。龍笛鵝笙調自殊。碧落空歌誰敢和。笑他郢雪祇區區。
析角分宮未易才。共將藻思瀉瓊瑰。一時駒豹爭聲價。曾唱鈞天法曲來。
詞筆湯徐信老成。同時對壘合爭衡。南湖花隱甌亭長。他日應傳供奉名。

錢唐汪沆西顯

仙音兩部協宮商。疊玉駢珠各擅場。此曲自從天上奏。不須樂府數康王。
萬國歡心奉一人。親扶紫闕駐湖濱。山呼不是虛無事。帝德懷柔及百神。
山海仙靈絳節朝。花明行殿競雲韶。欣知聖母西方佛。聽慣瑤房鳳唳簫。
新詞譜出合笙鏞。雙管真堪峙兩峯。卻笑粗才晁協律。祇歌並蒂有芙蓉。

祁門馬曰璐半查

調水仙子 黃鐘宮

東都詞筆柳秦妍。北地新聲關馬傳。西京樂府康王擅。迓鸞旂。奏御筵。太和音。雙管齊宣。價重雲韶部。名
高黃絹篇。抄徧霞箋。

錢唐陳章竹町

調折桂令 雙調

譜梨園兩部詞章。味合酸甜。響應宮商。不演參軍。不編待制。不唱中郎。百靈走烟排隊仗。羣仙會雲翦衣裳。宋豔班香。玉輦南巡。供奉君王。

滿洲舒瞻堊畝

調清平樂

升平雅奏。付與雕龍手。二妙一時真罕有。記曲費他紅豆。譜成山淥湖光。傳來刻羽吟商。五色雲中扇。篋九重天上絲簧。

平湖張雲錦鐵珊

調慶春宮

八神弭節。七聖隨車。翠華南幸重覩。熊館花明。鵝池柳細。一時行幄同扈。粉箋銀管。話多少。迎鑾詞賦。雙成妙曲。誰似仙韶。舜瞳曾顧。付他關馬名流。周秦好手也。難翻譜。移宮換徵。錦心繡口。繪出升平春宇。六橋三竺。儘贏得。錫簫茶鼓。魚龍爭演。壓倒東嘉。瑞光交處。

錢唐張湄柳漁

調齊天樂

和聲雙鳳穿雲叫。天上人閒都滿。調協黃鍾韻。飄白雪。壓盡錦城絲管。幔亭何遠。儼三島羣真。驂鸞陪輦。
王母蓬池。小桃紅暎水清淺。漫論馬枚遲速。翩翩詞賦手。總輸歌板。絳樹千圍。驪珠一串。好趁花飛鷺。
嘯重瞳迴眷。正湖鑑澄空。山屏翠展。雅樂流傳。補省方盛典。

□□周宣猷雪舫

調臨江仙

一代酸甜誇並轡。香荃齊按金徽。蘸來湖淥點山霏。虞廷雙玉琯。漢院五銖衣。福洞仙真都活現。九天鸞鳳爭飛。至尊含笑駐雲旂。漪風聆鞠部。曳綵看支機。

樊榭山房集外曲卷上

迎鑾新曲首套

錢塘縣國子生臣吳城恭填

羣仙祝壽

第一折

(老生扮許邁引仙童上)

(仙呂)【小蓬萊】欲識蓬山仙界。看簾風吹斷紅埃。丹葩紫草。芳蕤一片。傍砌分栽。

樓閣參差護碧烟。山前山後盡芝田。桃花日日隨流水。長伴仙翁不記年。自家許邁。字叔元。名列上真。位階仙苑。乘鸞跨鶴。歷三山五岳之奇。煮石烹茶。齊碧海青天之壽。只因俺性嗜西湖。故此時常樓止。聞得當今聖人。恭奉聖母鑾輿。巡幸浙水。順省方之鉅典。喜觀天顏。奉長樂之歡心。咸欣聖孝。意欲約同仙真。葛洪奏聞王母。邀請境內衆仙。恭迎聖駕。速去走一遭也。

(仙呂)【過曲】【桂枝香】竹飄虛籟。山橫遙黛。說甚變化壺中。落得逍遙塵外。趁初陽正開。初陽正開。曦霞餐滃。眠雲敲靄。已是稚川門首了。謾疑猜。不爲談元至。相將謁聖偕。

(末扮葛洪上)敢言抱朴平生志。贏得參同此日閑。(見介)久違仙範。近况云何。(末)

【前腔】丹砂曾丐。黃庭曾解。底用燕待羅浮。剩有書傳瀛海。葛洪呵。到於今聘懷。於今聘懷。聽得那。濤聲澎

泚禽聲幽怪。展青鞋。詰曲穿花徑。延緣泛水涯。

仙真遠臨。乞道何意。(老生)

【前腔】聖明當代。乾坤交泰。願億載笑展慈顏。便萬里春歸行在。信神人允諧。神人允諧。帝巡書載。王遊風采。古今皆瑞氣。連闔闔。歡聲動草萊。

因此特過仙山。同往瑤池。奏聞王母。邀集衆仙。接駕則箇。(末)正合愚意。就請同行。

【解三醒】抱血氣。尊親同戴。合遠近。天仙齊會。(合)飄車羽輪。西池界。遙望見翠鬢堆。瓊樓十二縹緲開。弱水三千頃刻來。門兒外。但是斑斑白鹿。點點青苔。

【尾聲】素蓮飄。冰桃大。果然風景四時佳。試聽隱隱雲璈樹外迴。

(老)聲滿西湖諧萬姓。(末)歡騰南極擁千祥。

(老)年年記取東風好。(末)長共羣仙泛玉漿。

第二折

(旦扮董雙成上)

(仙呂)【點絳脣】柳煨花明。玉笙吹徹仙音院。瑞烟如篆。半面重簾捲。(小旦扮何仙姑上)(頭換)幾疊霓裳。未許嫦娥擅。花枝顫。舞羣輕轉。待把鈞天演。

(旦) 隨鸞祥雲映太清。(小旦) 吹笙絕藝說變成。(旦) 仙姑也解人閒樂。(小旦) 重譜黃鍾第一聲。(旦) 俺董雙成也。(小旦) 俺何仙姑也。(旦) 昨日王母大會羣仙設宴瑤池說及你我二人俱係浙江人氏命掌仙樂演習歌舞以備聖母萬壽供奉正是雅音傳懿範昭格豫神人道言未了王母早降。(老旦) 扮王母引衆女仙上。

【前腔】絳闕風和瓊臺日麗開晴嶽彩雲扶輦朱鳥窗前偃。(頭) 永祝金縢率土同歡忭天心眷寶林仙苑歲歲欣蔥蒨。

火棗交梨取次嘗雲中雞犬任翱翔從今閑話長生訣共仰慈宮壽域長自家西王母是也昨日於瑤池席上曾命董何二仙演習歌舞未知可精熟否。(旦) 小旦) 已演習了還求王母指授。(老旦) 且聽我道來。

(黃鐘) 絳都春序曰稽舜典論聲歌允諧惟蘷克擅廣大清明取象還將乾坤辨陽阿激楚新聲變侈後代巴渝繁衍怎如今日呵武功文德廣歌帝載舞千重見。

(小旦) 且合)

【前腔】(頭) 仙眷深沈洞府把協律成章源流論徧始識元聲只在天家通明殿雲謠月譜從容薦笑塵世填詞三變算來此曲難聞錦水管絃都賤。

(老生末上) 遙聆白雪唱不數紫雲迴(見介) 許邁葛洪參見(老旦) 二仙少禮(老生末) 聖駕將幸西湖特來奏聞王母。邀集衆仙同去迎接。(老旦) 已知道了可站列兩階試看歌舞一週(內十番舞介)(合)

【畫眉序】聲入九重天。吐自朱唇一串。偏似驪珠散迸。萬顆勻圓。臨風度梁繞雲停。催腔急鸞鳴鳳嘯。析宮分角爭嘹唳。這法曲世人知鮮。

【前腔】妙舞聽張弦。緩步攏毵萬態妍。但迴腰舉腕。欲去仍旋。低昂袖底陋驚鴻。輕盈掌上嚙飛燕。柳絲搖曳嬌難狀。正一對翠盤佳選。

（老旦）歌舞已畢。就此同往西湖去也。（合）

【雙聲子】餘音遠。餘音遠。曲檻外。仁風扇。嘉瑞顯。嘉瑞顯。玉階下。仙莫現。語衆仙。語衆仙。導引先。導引先。記今朝雅樂。奏向鈞天。

【尾聲】崑崙駕起祥雲便。恰逢春色湖隄倩。備下兩宮歡宴。

階前百獸猶能舞。樹外雙鸞也助歌。

況是神仙逢盛代。可無雅樂奏金坡。

第三折

（老生上）

【雙角清江引】喜天心俯順蒼生想。法祖時巡講。（末上）三千禮樂彰。百二河山壯。（合）今日箇迎候翠華仙子往。

(老生)俺許邁奉王母之命，邀請浙西衆仙，今已約下了。(末)俺葛洪奉王母之命，邀請浙東衆仙，今已約下了。(見介)(老生)請問仙真，邀的那幾位。(末)俺邀的劉晨、阮肇、黃初平、劉綱、桐君五位，請問仙真，也邀了幾位。(老生)俺邀得蔡經一位。(末)爲何甚少。(老生)浙西神仙不少，因王母只許邀請上八洞神仙，其餘散仙，未敢擅請。况合你我二人，已足八仙之數了。你看白雲冉冉，黃鶴翩翩，敢是衆仙俱到也。

【前腔】(生扮劉晨上)小桃花占斷天台港，賺得劉郎賞。(小生扮阮肇上)胡麻泛水香，阮肇相將訪。(合)今日箇迎候翠華仙子往。

【前腔】(外扮黃初平上)笑初平叱石成羊，妄仙術，竄嫌創。(淨扮桐君上)桐爲姓氏詳，採藥披仙篋。(合)今日箇迎候翠華仙子往。

【前腔】(副淨扮劉綱上)問劉綱夫婦離塵網，古未昇天兩。(丑扮蔡經上)麻姑鳥爪長，蔡子思搔癢。(合)今日箇迎候翠華仙子往。

(見介)(丑)俺記得當初，也是二位仙真爲首，邀俺們恭迎聖祖仁皇帝聖駕。這話算來，已四十多年了。(老生)當初聖祖南巡，深仁厚澤，淪肌浹髓，浙江士庶，至今謳歌不已。後來神聖繼承，到了當今聖人，因臣民之願望，法皇祖以時巡，萬方同慶，乃亙古以來，罕見之盛典也。

【沈醉東風】當日呵，荷皇祖恩波疊降，幸江南爲勸耕桑，兩峰柳影中，三竺泉聲上，將民瘼宵旰頻咨訪。

〔合〕今日聖聖相承重省方。端的是昇平景象。

〔生〕俺記得當初湖上，俱有聖祖皇帝御製詩篇，御書匾額，供奉十景，真覺湖山生色也。

〔前腔〕羞說那柏梁篇漢宮絕唱，羞說那飛白字唐家擅場。篇篇律呂宣，字字珠璣晃。至今碑版燦天章，今上駐蹕湖上，萬幾餘暇，少不得〔合〕灑翰題詩玉管香，添勝境光芒萬丈。

〔外〕俺記得聖祖皇帝，幸了杭州，又幸越中，也是這箇時節。

〔前腔〕記當年鸞輪幾行，待華旂問渡錢江。搜奇禹穴邊，修禊蘭亭上。見塗歌巷舞慶豐穰。〔合〕桃綻輕紅柳吐黃，正此際風和景朗。

〔老生〕俺歷覽史冊，自古帝王巡幸，不過文人學士賦詩獻頌而已。羣仙祝壽，真曠世所罕聞也。

〔前腔〕休再說崔駟頌將主德揚，休再說子雲賦把帝巡彰。何如腰懸負局錢，手曳壺公杖。慈宮共祝壽而康。〔合〕不是聖德巍巍邁帝唐，怎得箇羣仙共仰。

〔小丑扮劉海上〕醉眠松陰下，閑過白雲嶺。要去即便去，直入晴霞影。自家劉元英，別號海蟾子，燕地廣陵人也。偶然遊戲人間，聞得浙江衆仙恭迎聖駕，真乃千秋盛會。因此飛行前來則箇〔見介〕仙真爲何瞞著俺麼？〔老生〕因仙真籍非吾浙，故不奉邀。今既到此，不妨同行。〔小丑〕試看俺舞金錢一回者。〔跳舞介〕〔合〕

〔清江引〕身居福地多蕭爽，久絕塵緣想。烟霞舊願償，雨露今時暢。彤雲裏，但聞仙珮響。

【尾聲】人間休說桃源謠。甲乙奚煩虛懸帳。迎鑾似此今古曠。

扶桑曉日照瞳矐。天上人閒望幸同。

不用繁華循故事。惟將悃愫答宸衷。

第四折

（生扮仙童上）好風吹縹緲琉璃。幾樹垂楊正及時。試聽九重仙樂奏。天顏有喜近臣知。自家王母位下仙童是也。俺王母大集羣仙。前來湖上恭祝聖壽。命俺先來此伺候。真箇好景致。但見寶鑑無塵。畫屏施采。重重碧水護祥光。隱隱翠巒籠瑞靄。圍圍洋洋。高高下下。真箇魚躍鸞飛呈氣象。遠遠近近。盤盤旋旋。果然龍飛鳳舞壯山川。六和塔。雷峯塔。保俶塔。靈鷲塔。錯錯落落。塔邊鐘磬坐來聞。柳洲亭。放鶴亭。湖心亭。冷泉亭。參參差差。亭外暉陰閑裏見。六橋外。六橋裏。紅紅綠綠。萬株楊柳萬株桃。高峯南。高峯北。透透迤迤。無限風光無限景。花宮繚繞。層層疊疊。若環若衛。峯自此而難飛。春日融和。舒舒遲遲。以拂以披。泉從茲而勿冷。遙接著祝釐的寶地。瑤階碧瓦。霏霏郁郁。焚香拜手百千春。近連著駐蹕的行宮。鳳起鸞浮。燦燦輝輝。結綵懸燈十萬戶。排列著軒轅鼎。夔龍彝。燧皇圖。姬公籍。齊齊整整。萬幾有暇奉宸歡。准備著秋兔毫。盤龍硯。烏金墨。輦玉箋。灑灑洋洋。千首既成抒睿藻。雅雅魚魚。班行鵷立。螭頭上。都是些東馬殿徐濟濟。踰踰侍從雲行。豹尾前。數不盡。臯夔稷契。春省耕。秋省斂。九圻九宇。咸欣覆載無私。望如日。瞻如雲。異域殊鄉。共信甄陶最廣。怎見得時值昇平。合浙水東西。駟車繡幌。招要仙子下三山。要知道世躋仁壽。徧大江南北。白叟黃童。慶祝慈宮稱億歲。正是好將天上羣仙事。留與人閒信史傳。言之未了。羣仙早上。（老旦扮王母引女八仙上）

【北雙調新水令】太平天子坐垂衣，徧寰區一團和氣，攜鳧離海嶠，騎鶴下雲扉。（合）行傍宮闈，共瞻仰龍顏喜。

（男八仙上）

（南仙呂入雙調）步步嬌聽一路熙熙，歡聲沸里巷華封擬。高堂獻綵衣，就養無方，盡道天家賜。爲問海外十洲遊，何似身到三皇世。

（見介）（老旦）衆仙俱已齊集，就此西湖去也。

【北折桂令】御天風蚤到湖西，只見乳燕飛飛，弱柳差差，鐘響南屏，月印三潭，春滿蘇隄，爭覓擊歌翻碧犀，鬪芳馨酒賣青旗。須知道德被氓黎，應早是喚動鳧鷖。

【南江兒水】（男女仙合）雨足新茶焙，湖寬舊水肥。花迎輦路幽香細，禽鳴禁樹新聲膩。魚遊靈沼纖鱗侈，身在春風知未。萬物咸熙，願付史官頻記。

（老旦）來此已近行宮了，衆仙們各整肅而進。

【北雁兒落帶得勝令】正雲光覆殿低，更塔影侵簾麗。我聖母祥徵華渚符，瑞表瑤光異。真個是周姜婦德齊，太姒徽音繼。因此上，渡蜃海迢遙路，頌璇宮福壽宜。依依看寶婺明坤位，遲遲喜春暉朗殿帷。

（老旦）當今聖主，尊親備至，孝養兼隆，洵古昔所稀聞，宜嘉休之並集也。（合）

【南僥僥令】則見蕙草兒庭前出。又見玉雞兒檻外飛。合舜鑿堯樽承歡笑。天下臣民尊母儀。

(老旦)許葛二仙。可將摘卜仙桃。恭祝聖壽者。(老生末合)

【北收江南】這蟠桃再熟問誰知。占東風嘗趁暮春期。笑當年曼倩幾偷窺。喜纍纍子垂。喜纍纍子垂。急低頭再拜獻丹墀。

(老旦)董何二仙。可將釀成仙酒。恭祝聖壽者。(旦小旦合)

【南園林好】這酒呵。勝中山千宵醞奇。問阿姆餘杭兌未。莫再羨浚巡滋味。須早把獻彤闈。須早把獻彤闈。

(老旦)衆仙們。可隨俺叩祝聖壽者。(衆叩頭介)(合)

【北沽美酒帶太平令】漫道俺做神仙入世稀。做神仙入世稀。也一般兒鵠立班行裏。萬歲嵩呼舞蹈齊。望山龍袞衣。與千官同跪起。紅冉冉花光明媚。碧豔豔波紋織綺。韻幽幽歌聲輕脆。嫋婷婷舞衫搖曳。不覺的神夷。意怡目迷。問洞天。應敷西湖第一。

【北清江引】羣仙祝壽從今始。熟得朝廷禮。山餘鳳鳥鳴。樂備簫韶細。願歲歲年年歡似此。

行宮高起接青雲。仙樂風飄處處聞。

惟祝萬年綿壽算。慈闈常護聖明君。

樊榭山房集外曲卷下

迎鑾新曲次套

百靈效瑞

錢塘縣貢士臣厲鶚恭填

第一折

(旦扮觀音，小旦扮善財，貼扮龍女，雜扮十六羅漢，四金剛，韋馱，四揭帝神上。)

【仙呂】點絳脣 瓔珞飄揚，寶冠搖漾，天人相來賀吾皇。花雨繽紛降。

某乃觀音大士是也。從聞思修，證圓通果，示三十二應。現身普度有情諸佛子。列五十三善知識。羣依自在大慈容。入道在普陀洛伽山。瑞像居天竺靈感院。福國祐民。盡道是祈晴則晴，祈雨則雨。尋聲憫世。真箇是求女得女，求男得男。近日暫往海南。過歸浙石。恭聞當今聖主，俯允臣民之請，駕幸杭州。駐蹕湖上。際此民安物阜之時，欣逢就日瞻雲之會。大好太平景象也。(行介)

【混江龍】(唱)仁風遐暢，莫階化日影舒長。說不盡三辰效順，五嶽呈祥。講遍了納賈陳詩周典禮，施徧了蠲租賜復漢恩光。勞牛酒，問高年一箇箇童顏兒齒，娛士女設大酬。一箇箇袂服新妝，陳鹵簿，有八十一乘。屬車豹尾，權御舟，過三千餘里。巨艦龍驤，昨年開上崧高山。呼萬歲，往昔裏巡五臺，佛現中央。今日箇浮河濟，達淮江，臨越甸，過吳邦。多只爲慰萬姓，堯衢夏諺豫游心。答羣僚顏與丙節，勤拳望方信的。兩宮有慶，景福無疆。

(旦白)緩駕香雲來此已是西湖地面了。

【油葫蘆】俺則見百頃琉璃水月鄉。皺微風吹細浪。雙峯高峙碧霄旁。兩隄倒映青匳向。六橋橫跨銀潢。上點梅花林叟家。垂楊柳蘇仙舫。識歡心黃鳥林間唱。喜孜孜長願奉君王。

行到孤山敬瞻行殿。正是不華不樸。制度得中。足見臣民仰體聖懷也。(合唱)

【天下樂】暢好是一帶柔條繞苑牆。紅也波。廊俯練塘。萬花中界開樓瓦黃。並靈臺不日成。陋宣房爾許忙。嗤長楊何太廣。

(旦白)聖主睿藻冠絕古今。發揮題詠。湖山抑何幸乎。(旦唱)

【那吒令】步春隄曉光看魚吞錦香。聽鶯歌柳房。挹荷風水窗。汎秋湖月航。弄三潭夜涼。鑲雲峯夕照低。踏殘雪昏鐘撞。費騷人多少評量。

【鵲踏枝】(合唱)抉雲漢。挾天章。瀉驪珠。耀星芒。攬取山川萬態難藏。舞俄頃。蛟龍滿紙。怪不得動天顏。常侍登牀。

(衆)啓菩薩已到殿庭了。(旦中坐案分立介)

【寄生草】(旦唱)碧嶂圍蓮界。青松蔭繡幢。臺前臺後花開放。山南山北雲消長。湖分湖合泉清壯。印證了無來無去妙明心。方纔是不增不減神光像。

善財過來。(小旦)菩薩有何分付。(旦)聖駕將臨，你速去召取大江以南，至於浙省，一切山祇海若，整齊隊伍，迎護翠華，須小心在意者。

【幺篇】翻翻秋芳閣，哦哦中印堂，紫竹林當不得迎鑾仗，白鸚哥當不得清葭響，柳枝瓶當不得金吾棒，好喚取靈祇導駕，莫留連，纔顯得神通護國能停當。

【賺尾】(唱)治世轉輪王，出世牟尼藏，受海衆無邊供養，怎比得聖德神功流厚壤，處茅檐願睹軒裳，看朱方五采飛翔，且暫離青猊選佛場，莫推辭雙趺滉漾，雙丫搖宕，裏兒閒駕青蓮一瓣到錢塘。

(小旦)領法旨(同下)

第二折

(末扮黃巾力士上)懷柔溥徧浙河濱，長願揚靈扈聖君，千乘載花紅一色，人間遙指是祥雲。某乃黃巾力士，蒙大士法旨，叫俺趨齋法駕隊子，前隨諸神，同去擁衛鑾儀，這早晚敢俱到也。(下)(生扮金山水府，旦扮江妃上)(生)某乃金山水府之神。(旦)某乃江妃。(合)大士召我等恭迎聖駕，快去走一遭也。

(黃鐘)【絳都春序】(唱)(生)金鼈背小，見璇宮湧來，分明員嶠，一派南冷，兩岸鐘聲，搖昏曉。(旦)此中帝澤，涵深窈，指水府龜鼈梁造。(唱)(合)御風衣冷，凌波步淺，總堪前導。

(下)(外扮焦公，小生扮陸羽上)(外)某乃焦山明應公，焦先。(小生)某乃惠山茶神陸羽。(合)蒙大士召我等恭迎聖駕，快去走

一遭也。

【啄木兒】(外)雲留漢山姓焦黃犢廬空風葉掃。(小生)剩舊時一卷茶經瀉花瓷第二泉邀。(合)靜中細參元關妙幽人幸廁華林校惟有水月松風酬聖朝。

(下) (丑)扮矮王珣副淨扮靈崑山神上。(丑)某乃虎丘山短主簿王珣(副淨)某乃靈崑山神(合)大士召我等恭迎聖駕快去走一遭也。

【歸朝歡】(丑)東亭宅東亭宅已改梵寮又何處令公喜惱。(副淨)涵空閣涵空閣采香徑遙權句管琴臺剩妖。(合)臨風別彈南薰調太平天子宸游好共把豹尾中間宿靄消。

(下) (淨)扮錢塘君末扮南鎮雜扮庚辰上。(淨)某乃錢塘君(末)某乃南鎮永興公(雜)某乃大禹臣庚辰(合)大士命我等恭迎聖駕快去走一遭也。

【出隊子】(淨)涇河能報貴主還宮奏鳳簫。(末)苗山金簡鎮南標。(雜)同鎖支祈息浪濤。(合)再拜雲旂須慶所遭。

(下) (雜)扮越王句踐生扮王右軍上。(雜)某乃與龍山主越王句踐(生)某乃會稽內史右將軍王羲之(合)大士召我等恭迎聖駕快去走一遭也。

【滴溜子】(雜)天垂念天垂念臥薪未老人懷古人懷古臥龍尙抱。(生)茂林清流相照山光似永和千

年過鳥(唱)世際唐虞羣瞻柘袍。

(下)(衆神同上)列位尊神請了(衆除淨白)大士命我等恭迎聖駕俱已到齊只有西湖水仙王東海龍王二位何故未到(淨白)大士因龍王職掌東溟事務重大命他同三位龍王往海屋添籌遙祝聖壽水仙王兼管花神大士命他火急催花供奉御覽以此俱不得出境耳(衆)原來如此。

【水仙子】(唱)水府來山靈到約同心爲迎左纛東風暝一路塵清瑞烟籠罩崆峒扈蹕何曾憚勞。

(同下)(小旦扮善財上)諸神俱已前往便好覆大士法旨去也。

【尾聲】百城烟水游行早看盡風光佳妙好上覆天竺堂中白玉毫。

(跳舞筋斗下)

第三折

(雜扮鼈精上)聶躡蓬山首戴(雜扮龜精上)曾因大禹成梁(雜扮鼈精上)滄溟夜聽鼓聲長(雜扮蛟精上)解化嫺娟形狀(雜扮魚精上)萬斛丹吞不飽(雜扮龜精上)肯隨人決行藏(雜扮鯀精上)胥潮日夜穴中忙(雜扮烏鰂精上)文字波臣無兩(鼈)某乃冠山侯(龜)某乃染指大夫(鼈)某乃知更令史(蛟)某乃橫飛大將(魚)某乃千里伯(龜)某乃通靈使者(鯀)某乃泥中校尉(烏鰂)某乃噴墨小吏(合)龍君升殿我等只得在此伺候。

(仙呂入)【六么令】(雜扮東海龍王引二夜叉上)鯨波擘開射彤庭旭影罍罍兩曹掌事介鱗排齊俯首立瑤

階蓬瀛盡處雲成彩。

天水青銅一色磨。升平重見不揚波。誰知帝力臻豐熟。只道滄溟滯澤多。某乃東海龍王是也。已曾着海童去請南西北海三位龍兄。想就到了。

【夜行船】(三雜扮三海龍王各引二夜叉上)(南唱)鵬圖南運煩神宰。繞天池尺木飛來。(四唱)鯨翼低時。蟾光落處。(北唱)應坎位。洪濤無賊。

(南)某乃南海龍王是也。(西)某乃西海龍王是也。(北)某乃北海龍王是也。(合)東海龍兄。請我等議事。就此相見。(見介)不知龍兄見召。有何台諭。(東)當今聖上。駕幸杭州。地近東海。大士因海屋一座。向爲某所管轄。特命請齊三位龍兄。同往添壽。恭獻吾皇萬年之壽。卽請同行。(夜叉下持壽四枝上行介)

【曉行序】蜃市蠓街。捲千層銀浪。已過水晶城外。誇瑰異。更有寶藏儲財無涯。碧樹珊瑚東際。渺渺扶桑爲界。何在錦霞中。遠望海屋奇哉。

(場上高設海屋。中貯金瓶。瓶內有壽)(衆)好一座海屋也。不知創造何年。乞龍王指示其詳。

(中呂入)(雙調)(好事近)(四龍王合唱)元氣構樓臺。叶祥符兩儀清泰。喜自然。楹檻虹梁。星牖雲階。靈槎到處。依一片河源遙分派。九成邊最近三臺。四注畔高標左海。

(四龍王合)我等就此添壽。遙祝聖壽者。(東)浩蕩恩波徹海壖。(西)九如三祝頌連駟。(南)皇家寶祚無疆算。(北)海上仙壽不記。

年（添壽介）（各三跪九叩頭介）萬歲萬歲萬萬歲（起指海屋衆合唱）

【千秋歲】鏤金牌勝似凌雲槩。書壽字迴文篆。堪愛壽域遙開。壽域遙開。看福曜照臨。齊天之大。觥籌迭更籌再。總不比籌添無礙。拚舞弧南拜。願江山共老。億兆同偕。

（四龍王白）分付整肅回宮（衆合唱）

【尾聲】滌森歸墟聖德諧。聽謳歌。應被他。島夷荒外。訝千度蟠桃一度纔。

第四折

（生扮水仙王領四季催花使者上）

【中呂粉蝶兒】鞏固皇圖。真乃是鞏固皇圖。散穰春都做了人閒雨露。徧乾坤萬象敷腴。問閭閻行慶賞。只聽得笑歌無數。捧紅雲喜降西湖。剛逢著惠風初布。

烟波管領三千頃。花月平分十二橋。某乃湖山神水仙王是也。菊薦寒泉。只許道仙配食。闌羞淨饌。也消袁尹陳詞。多年久冷香烟。盛世新崇廟食。兼掌著司花權柄。又纔臨鬪草時光。無以舒聖主駐蹕宸衷。惟有盡臣子當時本職。四季催花使者過來。（四花使）有（生）你可喚到十三月花神。命他各顯神通。攫取百花齊放。恭候駕臨。不可有誤。（四花使）得令（下）

【石榴花】（生）俺只向冷泉亭。煨熨土膏蘇。白雲峯醞釀草心鋪。一陣陣熏梅染柳。日映風扶。把冰紋兒坼玉。雪點兒融珠。閒著這浙零零的香雨兒潤的蕨蕨吐。怯尖尖嫩春寒句住。把我這錦雲鄉緊倩的東君護。休待要

羯鼓喚花奴。

(四季催花使者領十三月花神上)

【鬪鶻鶻】(唱)嬌滴滴的粉杏籠烟。濟瀼瀼的紅荷銷暑。遠芬芬的月桂凌雲。清冷冷的山茶照塢。抵多少畫院徐黃沒骨圖。咱們管了這花呵。不用他鬧叢叢錦障酥盤。全倚着一準準的祥風甘雨。

衆花神參見(生)你們著意開花。得邀天眷。是好饒倖也。

【撲燈蛾犯】(唱)暖溶溶龍口繞宮渠。碧悠悠春波錦塘路。顛巍巍翠峯遮翠幌。吹裊裊楊柳樓心暮。聲細細的簫韶鐘呂。拍浮浮水檻外鷗鳧。鬢靄靄中和節屆。豔穠穠待換花師試手共花姑。

(衆花神下)(生)花神此去。必定爭香鬪色。占盡天工。生成錦繡湖山。簇就升平世界也呵。

【上小樓】笑吟吟分了蓼影離離。圯了跌。真乃是按著花經。護著花鈴。執著花符。大古來畫檻移春。綠房迎曉。玉盤承露。不用著建青幡也。惱阿醋。

(衆花神各持本月花上)寶砌春長數月地。御袍香重慶花天。啓上尊神。百花齊放哩。(生)隨我向行宮去。(行介)你們將花。暢舞一回。好向御前獻上。叩謝天恩。俾爾等句萌成若。各遂其性也。(衆舞花介)

【疊字犯】(合)翩翩鸞回鳳翥。颯颯紅翻翠舉。翩翩的雨曼殊。傲傲的搖寶珠。綏綏苒苒逐隊兒飛絮。燦燦披天衣六銖。一箇箇待袞徧攬揄。去去來來。吸花絲萬縷。拜拜拜天顏博一笑。九域盡熙愉。

(舞花擺作天子萬年字介)(衆三跪九叩介)萬歲。萬歲。萬歲。

【尾聲】駐時巡。乘春豫。有神女三漿捧玉壺。只把這無數花鬚。從今將聖壽數。

樊榭山房集外曲跋

是曲手稿。向藏余家振綺堂。首套曰羣仙祝壽。吳甌亭太學撰。厲樊榭徵君參定。次套曰百靈效瑞。厲樊榭徵君撰。吳甌亭太學參定。咸豐辛酉。粵匪再陷杭城。手稿遂亡。客歲余讐校徵君古文詩詞。彙爲全集。丁松生大令丙。郵寄是曲舊本。屬附槩于集外詩詞之後。舛誤頗多。經諸遲翰大令可寶。參互而考訂之。爰跋數語。以識顛末。光緒十一年乙酉冬十月。錢塘汪曾唯。

